

2 Gaolliqthu

Gevq-a nail gaq

Haoqgavq niil keiv iqmoeq ilmoeq bhai Gaqkhoel Paolluv aivq-i mail gevq-a nail ngaol dai, gevq-ai thaq nail ngaol. Al ovqtavq, milnee uqnee khe Khali yaq juq iqsanl, Paolluv-i mail gevq-a nail ngaol dai, noeq nail ngaol.

Gevq-a nail aqyanq khi mail aqduq

Gevq-a nail aqyanq neq, A.D. 55-57 kovq nail gaiqlaq bhai ngaol. Gevq-a nail aqduq neq, Maqgeiqdaolnil milkhaoq bhai ngaol.

Khaq sil gaq bhai gevq bhiq-a nail

Haoqgavq niil keiv Gaolliqthu meenq khe jaol nail Khali yaq munl bhai taivq-ail maq ngel nail, Aqgaqyal milkhaoq doi dai jaol nail Khali yaq juq bhai iqsanl gevq bhiq-a nail haoqgavq ngaol.

Khul bhai noeqthunq khi gevq-a nail

Paolluv Gaolliqthu meenq khe Khali yaq munl bhai Gaolliqthu nail haoqgavq iqmoeq ilmoeq gevq bhiq gaq khi maq maoq maq heel lal mail ganl mee nia pha q ya gaiq-a nail ngaol. Ganl al neq, Paolluv neq, maldil gaqkhoel maq ngel-ail dai, khal ge movq-ail ge khi cavq bheeq nail juq jaol nail ngaol. Alheel ngel-i mail, Paolluv khul khi mail gaqkhoel teevq gaq pevq khi ya nl ya hal ya daq-a nail ganl teevq pha q gil-a neq, teevq pha q aqmeeq-ai cavq naq bhiq nail dai khi, gevq-a nail ngaol. Al ovqtavq, Paolluv aivq

Gaolliqthu meenq bhai lee naol dai, bhi heeq kivq nail haqbhoil iqsanl gevq-a nail ngaol.

1 Gaolliqthu khi 2 Gaolliqthu nail gaiqlaq bhai Paolluv nail haoqgavq teevq keiv peiv ail-a nail ngaol. Al nail lavqkhoel khe ganl teevq pav ganav juq, 2 Gaolliqthu haoqgavq lavqkhoel bhai gevq bhoel-ai thaq nail ngaol.

Iqmoeq ilmoeq khe daoq

¹ Ngal neq, Paolluv ngaol. Miqyail neema tsaq nail ngel-i mail, Yeiqsul Khali nail gaqkhoel jiovq thailthaiq nail ngaol. Gaolliqthu meenq bhai jaol nail Miqyail nail tsaol-aq bhai maqkhaiq, Aqgaqyal milkhaoq doi dai jaol nail Khali yaq iqsanl bhai maqkhaiq, jaqbheq Tilmolseiq nv-nvq gaq haoqgavq niil gevq bhoel-ai leevq-a nail ngaol.

² Ngadao nail Aqbhu Miqyail khi Heeqphaq Yeiqsul Khali nail geeqlaoq eeljaol khi neesal-ovq nail pha q nuljuq nail kovtavq bhai jiav dei-eiq.

Paolluv Miqyail bhai tsiqeeq nail ganl

³ Ngadao nail Heeqphaq Yeiqsul Khali nail Aqbhu Miqyail bhai tsiqeeq bhel. Aivq neq, gaoqhaq gaiq-a nia nail Aqbhu ngaol. Yaoq pha q yaoq-ao nee nail lavqkhoel ngadao bhai neesal bhi ovq nail Miqyail iqsanl ngel nail ngaol.

⁴ Nvjuq ya daq nail iqsanl nail lavqkhoel bhai, aivq nvjuq bhai neesal bhi ovq lavq-a nail ngaol. Miqyail nvjuq bhai neesal bhi ovq lavq-a nail khe-ai, khoeq nail jiovq nail yaoq pha q yaoq-ao nee bhai ya daq nail tsaol-aq bhai nvjuq iqsanl neesal-ovq nail al pha q bivq kivq nail ngaol.

⁵ Khul khi mail dai ngal-aq neq, Khali-i mail ya daq-a nail haq nail aoq nail juq nvjuq nail lavqkhoel-ai mao lal-a nail khe-ai, Khali bhaqda nee Miqyail-i mail neesal bhi ovq lavq-a nail pha q bhai iqsanl, nvjuq nail lavqkhoel bhai mao lal thailthaiq nail ngaol. ⁶ Nvjuq haq nail aoq nail pha q bhai ya daq haq neq, nuljuq nail haqbhoil neesal-ovq nail pha q khi hevqkovq nail pha q pevq nail ngaol. Nvjuq neesal-ovq haq neq, nuljuq iqsanl nvjuq khe-ai, neesal-ovq nail ngaol. Alheel ngel-i mail, nvjuq-i mail ya daq-a nail juq nuljuq iqsanl ya daq-u phao, nuljuq oltsaol lal nail ngaol. ⁷ Ngal nuljuq nail ganl saol-nvq daiq haq neq, noeqthunq nail pha q ivqdao dai, jiav-ail nial. Khul khi mail dai ngal neq, nvjuq-i mail ya daq-a nail juq nuljuq iqsanl ya daq-a nail khe-ai, nvjuq nail neesal-ovq nail pha q nuljuq iqsanl ya nail ngaol dai, nvjuq heeq kivq nail ngaol.

⁸ Aqivq jaqbheq juq-ol, nvjuq Aqsil-aq milkhaoq bhai jaol-u phao, ya daq-a nail juq nail ganl nuljuq bhai bhi heeq kivq movq-ail nial. Ya sil nail jaol-aq dai, nvjuq noeq-u phao kev dai, maq khanq tsaol nail khoeq nail jio vq nail juq ya daq-a nail ngaol. ⁹ Nvjuq neq, ya sil naol dai, yalkhaq dal lavq-a nail bhai nvjuq ya daq-a nail khe-ai, dul nail ngaol. Nvjuq neq, yovqgavq nail aqmaol bhai yovqgavq maq juq mail, sil nail tsaol-aq bhai bhi doevq kovq lal nia nail Miqyail bhai taivq-ail juq dai, alhai pevq lal-a nail ngaol. ¹⁰ Aivq neq, a dai eeq nail sil nail pha q nail lavqkhoel nvjuq bhai bhi jel-ail lavq-a nail nee ovqtavq, yaqhao iqsanl bhi jel-ail lavq nail ngaol. Aivq nvjuq bhai bhi

jel-ail lavq dai, nvjuq aivq bhai noeqtunq nail ngaol. ¹¹ Nuljuq iqsanl geeqlaoq tsaol hal lavq nail ngel-i mail, aivq nvjuq bhai bhi jel-ail lavq nail ngaol. Tsaol-aq maodai geeqlaoq hal lavq-a nail bhaqda nee, nvjuq-i mail ya-a nail geeqlaoq eeljaol nail haqbhoil, tsaol-aq maodai Miqyail bhai tsiqeeq nail ngaol.

Paolluv khul khi mail maq lal-a nail ganl

¹² Nvjuq niailhai neema eeq duq ya nail ngaol. Miltsaq yaq nail sivtavq bhai maqkhaiq, a dai nee maqtsil nuljuq nail sivtavq bhai maqkhaiq, Miqyail-i mail bivq-ai leevq-a nail meeq nail haol nail pha q khi maldil tsaq nail pha q nail lavqkhoel nee nvjuq nl nail hal nail ngaol dai, nvjuq-i mail heeq kivq nail neema salkhil khanq nail ngaol. Nvjuq miltsaq nail neenoq neekha bhai juq juq-ail, alhai nl nail hal nail maq ngel-ail. Miqyail nail geeqlaoq eeljaol bhai juq nail ngaol. ¹³ Nuljuq-i mail maq ge nia nail pha q maq heeq nia nail pha q bhai nvjuq nuljuq bhai gevq bhoel-ai lavq-a nail maq ngel-ail. ¹⁴ Nuljuq maq gal dai heeq nia nail khe-ai, teevq bhee teevq lovq heeq nia lal dai, ngal noeqtunq nail ngaol. Nuljuq alhai heeq nia lal haq neq, ngadao nail Heeqphaq Yeiqsul nail aqn n-gaol nuljuq bhaqda nee nvjuq neema eeq duq ya nail khe-ai, nuljuq iqsanl nvjuq bhaqda nee neema eeq duq ya nail ngaol.

¹⁵ Ngal al bhai aqmeeq-ai neema thaqtsoal nail ngel-i mail, nuljuq nvq pov teevq pov geeqlaoq ya nia dai, ngal nuljuq jaol nail bha iqmoeq lal naol dai, noeq-ai tha q nail ngaol. ¹⁶ Ngal

Maqgeiqdaolnil milkhaoq bhai lai-u phao, nuljuq jaol nail bha nalga lal khi, a bhai nee mail kovq lee-u phao iqsanl, nuljuq jaol nail bha gaoq nalga lee naol dai, aq-u phao alhai noe-q-a nail ngaol. A bhai nee ngal-aq, nuljuq ngal loq nail pha-q bhai lainq lavq khi Yuldav milkhaoq bhai bhi hevq ha lai nail dai iqsanl, noe-q-a nail ngaol. ¹⁷ Ngal alhai noe-q-a nail ngel-i mail, maq duq maq tsil dai pevq nail laiq. Maq ngel haq neq, miltsaq yaq juq nl nail khe-ai, ngel nail pha-q iqsanl, maq ngel nail pha-q iqsanl, oil kheq oil lel khi mail, ngal ge nail laiq.

¹⁸ Miqyail saljial ivq nail khe-ai, ngaq-i mail nuljuq bhai ge bhiq-a nail daoq neq, ngel nail pha-q iqsanl, maq ngel nail pha-q iqsanl, oil kheq oil lel khi ge nail, maq ngel-ail. ¹⁹ Khul khi mail dai ngal-aq neq, Siqlav, Tilmolsei-q nvjuq-i mail nuljuq bhai cav bhiq-a nail Miqyail nail Ya-qyov Yeiqsul Khali neq, ngel nail pha-q iqsanl maq ngel nail pha-q iqsanl oil kheq oil lel-ai tha-q nail pha-q maq ngel-ail. Aivq nail lavqkhoel bhai neq, ngel nail pha-q teevq-eel ngaol. ²⁰ Miqyail nail saljial iqsanl neq, aivq nail lavqkhoel-ai ngel nail pha-q teevq-eel ngaol. Alheel ngel-i mail, ngadao nail Miqyail bhai tsiqeeq tsiqheel-u phao, Yeiqsul Khali bhaqda nee "Aqmiq" dai, ge nail ngaol. ²¹ Nuljuq nee mail teevq gaq khe-ai, nvjuq bhai Khali nail lavqkhoel-ai bhi jaol ivq lavq-a nail gaq khi tsel dov lavq-a nail gaq neq, Miqyail ngaol. ²² Aivq neq, ngadao bhai junq deeq-ai tha-q nail ngaol. Yaqhao jaiqbhoil ovq nail ngaol dai, ngadao heeq kivq dai, niil aq-il nee mail ngadao nail neema lavqkhoel-ai, aivq nail

Aqhaqlal bhi jaol lee-a nail ngaol.

²³ Ngal nuljuq bhai maq bhi noeqhaq movq nail ngel-i mail, Gaolliqthu meenq bhai maq lal-a nail ganl, Miqyail heeq nia nail ngaol. ²⁴ Nvjuq niailhai ge nail neq, nvjuq nuljuq nail neema thaqtsaol nail pha q bhai uvthaiq nail maq ngel-ail. Nuljuq neema thaqtsaol nail pha q neq, ivq nail ngaol. Nuljuq lavqkhiq tsail dai, nvjuq nuljuq nee mail teevq ga q khe-ai, nl thailthaiq nail ngaol.

2

¹ Alheel ngel-i mail, ngal nuljuq bhai maq bhi noeqhaq nail haqbhoil nuljuq jaol nail bha maq lee yaoq-aol dai, ngal noeqceiv-ai tha q nail ngaol. ² Ngal nuljuq bhai bhi noeqhaq ha q neq, kha sil ga q nga q bhai bhi noeqsal lal nia nail-aiq. Nga q-i mail bhi noeqhaq-a nail tsaol-a q taivq-ail, nga q bhai bhi noeqsal lal nia nail ngaol. ³ Alheel ngel-i mail, ngal nuljuq bhai haoqgavq al gevq bhoel-ai leevq-a nail ngaol. Ngal kev lee-u phao, nga q bhai lavqkhiq bhi tsail lal nail tsaol-a q juq, nga q bhai ma q ya bhi noeqhaq lavq dai, gevq bhoel-ai leevq-a nail ngaol. Ngal lavqkhiq tsail ha q neq, nuljuq iqsanl mail lavqkhiq tsail nail ngaol dai, nuljuq iqsanl nail neema bhai ngal heeq kivq nail ngaol. ⁴ Khul khi mail dai ngal-a q neq, noeqhaq deedee nail, khaoqlaol nail khi, maivbhil dov nail lavqkhoel nee, ngal nuljuq bhai haoqgavq al gevq bhoel-ai lavq-a nail ngaol. Nuljuq bhai bhi noeqhaq nail dai khi, gevq bhoel-ai lavq nail ma q ngel-ail. Ngal nuljuq bhai

khadai gaiq-a nail ngel-ail dai, nuljuq heeq nia dai, gevq bhoel-ai lavq-a nail ngaol.

Aqdoil nl lavq-a nail gaq bhai oeqbal phaiq bhiq nail ganl

⁵ Tsaol-aq teevq gaq ganav yu bhai bhi noe-qhaq nail pha q nl haq neq, ngaq bhai bhi noe-qhaq lavq nail nee maqtsil nuljuq bhai iqsanl bhi noe-qhaq lavq nail ngaol. Ngal niailhai ge nail neq, nuljuq bhai al jaiq maq ge jel movq-il. ⁶ Nuljuq jema o teevq pav aivq bhai alhai dal bhiq nail neq, gaq-ao nail ngaol. ⁷ Thailhai ngaol-aoq, noe-qhaq deede nail ngel-i mail, aivq maq noe q maq mav-ail maq ya pevq-ail dai, aivq nail oeqbal phaiq bhiq khi, aivq bhai bhi noeqsal nail neq, tsaq nail ngaol. ⁸ Alheel ngel-i mail, "Aqyu juq ngaq bhai maldil gaiq-a lao tha q nial" dai, aivq heeq nia dai, aivq bhai nl bhiq yaoq dai, ngal nuljuq bhai hal nail ngaol. ⁹ Al ovqtavq, nuljuq ngaq nail daoq yaoq daoq yaoq-ao nee bhai naldaiq-ail lai q dai, ngal ya heeq kivq dai, nuljuq bhai laonqda i q nail dai khi, ngal haoqgavq al gevq bhoel-ai lavq-a nail ngaol. ¹⁰ Nuljuq tsaol-aq al gaq nail oeqbal bhai phaiq bhiq haq neq, ngal iqsanl aivq nail oeqbal bhai phaiq bhiq nail ngaol. Khul khi mail dai ngal-aq neq, ngal oeqbal teevq pha q ganav bhai phaiq bhiq haq neq, nuljuq nail haqbhoil Khali nail sivtavq bhai, ngal phaiq bhiq-a nail ngaol. ¹¹ Alhai maq ngel haq neq, neivq Saqdaq ngadao bhai gaq lal nail ngaol. Ngadao aivq nail neenoeq bhai heeq kivq nail ngaol.

Paolluv Daqlol meenq bhai jaol-u phao, neema maq sal nail ganl

¹² Khali nail ganl lavqkhiq tsail nail geeqlaoq daoq cavq nail dai khi, ngal Daqlol meenq bhai kev lal-u phao, Miqyail ngaq nail haqbhoil gailkhaol phao daol lavq-a nail ngaol. ¹³ Thailhai ngaol-aog, ngal ngaq nail jaqbheq Tiltuv bhai Daqlol meenq bhai maq ya moel-a nail ngel-i mail, neema maq sal-il. Alheel ngel-i mail, ngal a bhai jaol nail tsaol-aq bhai daoq cavq cavq-ail ceevq khi, Maqgeiqdaolnil milkhaoq bha lal-a nail ngaol.

Khali bhaqda nee gaq lai-a nail tsaol-aq pevq lai-a nail ganl

¹⁴ Miqyail bhai tsiqeeq bhel. Khul khi mail dai ngal neq, ngadao juq Yeiqsul Khali nee teevq gaq khe-ai khaq mao iqsanl gaq lai dai, Miqyail hevq daiq lavq nail ngaol. Yu Khali bhai ya heeq nia dai, huqbhiq nil nail pha q yaoq dao yaoq-ao nee nil kev-ail dai, aivq ngadao bhai yuq lavq-a nail ngaol. ¹⁵ Khul khi mail dai ngal-aq neq, nvjuq neq, hevqkovq nail pha q ya-a nail tsaol-aq nail lavqkhoel bhai maqkhaiq, luq-ail seil-ail nail tsaol-aq nail lavqkhoel bhai maqkhaiq, Miqyail bhai laol bhiq nail Khali nail huqbhiq nil nail pha q pevq nail ngaol. ¹⁶ Luq-ail seil-ail nail tsaol-aq nail haqbhoil neq, bhi sil nail aqbu vq aqnil nil nail pha q khe-ai dul khi hevqkovq nail pha q ya nail tsaol-aq nail haqbhoil neq, bhi doevq lal nail huqbhiq nil nail pha q khe-ai dul nail ngaol. Niil heel nail ganl nl nia nail khaq sil gaq jaol nail-aiq. ¹⁷ Tsaol-aq maodai gaq Miqyail nail daoq cavq-u

phao, jailjeq ya dai, cavq nail ngaol. Nvjuq neq, alheel nail tsaol-aq maq ngel-ail. Miqyail-i mail bhi cavq lavq nail khe-ai taivq-ail, Miqyail nail sivtavq bhai Khali nail yaqkav khe-ai, meeq nail haol nail lavqkhoel nee, cavq nail ngaol.

3

Daoqma saljial aqsivq nail haqbhoil ganl nl nail

¹ Nvjuq neq, yovqgavq nail salkhil yovqgavq khanq nail ngel-ail laiq. Maq ngel haq neq, tsaol-aq teevq pav ganav juq-i mail nl nail khe-ai, nuljuq nail haqbhoil salkhil khanq nail haoqgavq gevq bhoel-ai lavq nail maqkhaiq, nuljuq-i mail gevq bhoel-ai leevq a nail salkhil khanq nail haoqgavq bhai maqkhaiq, nvjuq loq nail laiq.

² Nuljuq neq, nvjuq nail haqbhoil salkhil khanq nail haoqgavq pevq nail ngaol. Haoqgavq al, nvjuq nail neema bhai gevq-ai thaq nail ngaol. Tsaol-aq iqsanl mail haoqgavq al bhai heeq nia khi ge daiq nia nail ngaol. ³ Nuljuq neq, Khali-i mail gevq bhoel-ai leevq khi nvjuq-i mail oil ha lee-a nail haoqgavq teevq keiv pevq nail ngaol dai, bhaqlaoq kheq dai dov lal-a nail ngaol. Haoqgavq gevq nail dailkheq-i mail gevq-ai thaq nail haoqgavq maq ngel-ail. Lovmav nail dailpav kovtavq bhai gevq-ai thaq nail haoqgavq iqsanl maq ngel-ail. Aqdoevq doevq nail Miqyail nail Aqhaqlal-i mail tsaol-aq nail neema bhai gevq-ai thaq nail haoqgavq ngaol.

⁴ Khali bhai juq nail lavqkhoel nee Miqyail bhai neema eeq duq jiav nail ngel-i mail, nvjuq

niailhai ge tseq nail ngaol. ⁵ Thailhai ngaol-aog, ganl niil nvjuq teevq phaq-ail maq nl kivq-ail. Nvjuq nl kivq nail neenoeq neekha khi gaq neq, Miqyail-i mail bivq lavq-a nail phaq pevq nail ngaol. ⁶ Daoqma saljial aqsivq nail haqbhoil ganl nl kivq dai, Miqyail nvjuq bhai neenoeq neekha khi gaq bivq lavq-a nail ngaol. Daoqma saljial niil neq, gevq dov-ai thaq nail aoldaoq kovqdaoq bhai tavq nail maq ngel-ail. Aqhaqlal Miqyail bhai tavq nail ngaol. Khul khi mail dai ngal-aq neq, gevq dov-ai thaq nail aoldaoq kovqdaoq neq, lav heivq nail ngaol. Thailhai ngaol-aog, Aqhaqlal Miqyail neq, lav doevq nail ngaol.

⁷ Lovmav nail dailpav kovtavq-ai gevq-ai thaq nail lav heivq nail aoldaoq kovqdaoq neq, seiqleiq khaoqsail kav deede nail lavqkhoel nee, dov lal-a nail ngaol. Aq-u phao, Molseiq nail maivphaoq bhai bhaq dov lal-a nail seiqleiq khaoqsail peivq-ail thailthaiq khi ngaol-aog, Il-saqleiqal nail tsaol-aq aivq nail maivphaoq bhai maq heldaiq nia-u phao kev dai, seiqleiq khaoqsail bhaq dov lal-a nail ngaol. ⁸ Thailhai phal-iq neq, Aqhaqlal Miqyail bhai tavq nail ganl neq, a dai nee maqtsil seiqleiq khaoqsail khadai eeq jaiq nail-aiq. ⁹ Khul khi mail dai ngal-aq neq, yalkhaq dal lavq nail aoldaoq kovqdaoq kev lee-u phao, seiqleiq khaoqsail aol haq neq, tsaq nail daol nail tsaol-aq bhi pevq lal dai, nl nail phaq neq, a dai nee maqtsil seiqleiq khaoqsail khadai eeq jaiq nail-aiq. ¹⁰ Haoqnao khe dov lee-a nail seiqleiq khaoqsail neq, eeq dee mee deede nail ngel-i mail, iqmoeq khe jiav nail seiqleiq khaoqsail peivq-ai thaq nail khe-ai, dul

nail ngaol. ¹¹ Khul khi mail dai ngal-aq neq, peivq-ai thaq nail khe-ai dul nail al pha q seiqleiq khaoqsail aol nail lavqkhoel kev lee haq neq, ivq nail pha q neq, a dai nee maqtsil seiqleiq khaoqsail aol nail ngaol.

¹² Nvjuq niailhai noeqthunq duq ya nail ngel-i mail, geesil nail neema maq aol mail bhaqlaoq kheq dai, ge tseq nail ngaol. ¹³ Nvjuq neq, Molseiq khe-ai, maq dul-ail. Molseiq neq, peivq-ail thailthaiq nail seiqleiq khaoqsail bhai haoqnao naosaq kev dai, Ilsaqlaiqlal nail tsaol-aq bhai maq bhi heldaiq nail dai khi, aivq nail maivphaoq bhai haqphal he phee q-ai tha q nail ngaol. ¹⁴ Ilsaqlaiqlal nail tsaol-aq al juq nail neema aqgaol gaol lal-a nail ngel-i mail, yanqgaol kev dai, daoqma saljial aqlil bhai ge-u phao, he phee q-ai tha q nail haqphal al maq phao lal haq-al. Khul khi mail dai ngal-aq neq, Khali bhaqda nee taivq-ail haqphal al phao lal nia nail ngaol. ¹⁵ Yanqgaol kev dai, Molseiq-i mail gevq-ai tha q nail haoqgavq bhai khal ge-u phao, aqyu juq nail neema bhai haqphal-i mail he phee q-ai tha q nail ngaol. ¹⁶ Thailhai ngaol-aq, khul yang bhai maqkhaiq, Heeqphaq Miqyail jaol nail phao kovq lal haq neq, he phee q-ai tha q nail haqphal al bhai Miqyail phao bhiq nail ngaol. ¹⁷ Miqyail neq, Aqhaqlal pevq khi, Miqyail nail Aqhaqlal khal jaol nail bhai, jel-ail nail pha q jia v nail ngaol. ¹⁸ Ngadao juq iqsanl mail haqphal maq he phee q-ai tha q nail pha oqdaiq bhai heldaiq nail khe-ai, Yeiqsul nail seiqleiq khaoqsail bhai heldaiq-u phao, ngadao iqsanl aivq khe-ai seiqleiq khaoqsail aol lal nail

ngaol. Ngadao seiqlaiq khaoqsail al teevq pov nee teevq pov bhaq jaiq lal dai, Aqhaqlal Miqyail nl lavq nail ngaol.

4

Miltsaq iqlaoq nail lavqkhoel bhai aol nail aqphoiq kav nail ganl

¹ Miqyail nail geeqlaoq eeljaol bhaqda nee nvjuq bhai ganl niil bhi nl lavq-a nail ngel-i mail, nvjuq nail neema gaq maq bhaq-ail. ² Nvjuq ganl niil nl-u phao, haqsil heeq phaqa-ail tsaq nail oil-uvq-ai thaq nail phaqa, teevq thal-iq nl naol dai, maq noeq-ail. Goiqbhaoq bhaq nail maqkhaiq, Miqyail nail daoq bhai aqdeq bhiq deq-ail dai maqkhaiq, nvjuq nl naol dai iqsanl, maq noeq-ail. Maldil tsaq nail phaqa bhai bhaqlaoq kheq dai phaodaiq bhiq nail lavqkhoel nee, Miqyail nail sivtavq-ai tsaol-aq iqsanl nail heeq nia nail neema bhai tsaq dai, nl nail ngaol. ³ Nvjuq-i mail cavq nail lavqkhiq tsail nail geeqlaoq daoq bhai he phee-ai thaq nail ngel haq neq, luq-ail seil-ail nail tsaol-aq nail haqbhoil taivq-ail he phee-ai thaq nail ngaol. ⁴ Miqyail pevq nail Khali nail seiqlaiq khaoqsail bhaq dov nail lavqkhiq tsail nail geeqlaoq daoq neq, neema maq thaqtsaol nail tsaol-aq bhai maq ya bhaq bhiq dai, miltsaq niilniai uvthaiq nail gaq pevq nail neivq Saqdaq aqyu juq nail neema bhai navtsee dai, bhi pevq ail-a nail ngaol. ⁵ Nvjuq neq, yovqgavq nail ganl yovqgavq cavq nail cov nail maq ngel-ail. Yeiqsul Khali neq, Heeqphaq ngaol dai, cavq bhiq nail nee ovqtavq, Yeiqsul nail haqbhoil nvjuq

nuljuq nail yaqkav pevq nail ganl cavq bhiq cov bhiq nail ngaol. ⁶ “Aqnav nail lavqkhoel bhai aqbhaq bhaq dov lal nail ngaol dei-eiq” dai, ge-ai thaq nail Miqyail neq, ngadao nail neema bhai aqbhaq bhaq lavq-a nail ngaol. Alheel ngel-i mail, Khali nail maivphaoq nee mail bhaq dov lee-a nail Miqyail nail seiqlaiq khaoqsail bhai ngadao ya moel khi ya heeq kivq dai, aqbhaq bhaq lavq thailthaiq nail ngaol.

⁷ Aqphoiq phoiq deede nail nlmaoq pevq nail seiqlaiq khaoqsail al, miltsaq iqlaoq nail lavqkhoel bhai aol nail khe-ai, ngadao juq neq, miltsaq iqlaoq kheel teevq-eel ngaol. Alheel ngel-i mail, eeq deede nail bhaqaoq al neq, nvjuq nail lavqkhoel nee dov lal-a nail maq ngel-ail. Miqyail nee mail dov lal-a nail ngaol dai, yu ya heeq nia nail ngaol. ⁸ Nvjuq yaoq pha q yaoq-ao nee lav tsoiq lal nail bhai ya daq khi ngaol-aoq, laol thaiq-ai lavq nail maq ngel-ail. Noeq-u maq dov khi ngaol-aoq, noeqthunq nail pha q ya-ai haq nail ngaol. ⁹ Khoeq lavq jio vq lavq nail bhai ya daq khi ngaol-aoq, Miqyail maq khaonq ha lavq-ail. Deeq tsuq lavq nail bhai ya daq khi ngaol-aoq, sil nail bhai kev dai, ya daq-a nail maq ngel-ail. ¹⁰ Yeiqsul nail aqdoevq doevq nail pha q nvjuq nail lavqkhoel bhai bhaqlaoq kheq dai dov lal dai, Yeiqsul nail sil nail pha q nvjuq nail aqmaol lavqkhoel bhai khaq mao iqsanl phi-nq tha q nail ngaol. ¹¹ Khul khi mail dai ngal-aq neq, Yeiqsul nail doevq nail pha q neq, sil nia nail nvjuq nail aqmaol lavqkhoel-ai bhaqlaoq kheq dai dov lal nia dai, nvjuq aqdoevq doevq-u phao, Yeiqsul nail haqbhoil sil dai khaq mao iqsanl av

bhiq nail bhai ya daq nail ngaol. ¹² Alheel ngel-i mail, nvjuq nail lavqkhoel-ai sil nail phaḡ ganl nl nail ngaol. Thailhai ngaol-aoḡ, nuljuq nail lavqkhoel bhai neḡ, doevq nail phaḡ ganl nl nail ngaol.

¹³ “Ngal neema thaḡtsaol nail ngel-i mail, ge-ai thaḡ nail ngaol” dai,

Jalliq lavqkhoel bhai gevq-ai thaḡ nail khe-ai, nvjuq iqsanl alhai neema thaḡtsaol khi ge nail ngaol. ¹⁴ Heeqphaḡ Yeiqsul bhai bhi doevq kovq lal-a nail gaḡ, nvjuq bhai iqsanl Yeiqsul nee mail bhi doevq kovq lal khi, nuljuq nee mail teevq gaḡ khe-ai, aivq nail sivtavq bhai nvjuq bhai bhi jaol lavq nail ngaol dai, nvjuq heeq kivq nail ngaol. ¹⁵ Al juq iqsanl mail nuljuq nail haḡbhoil ngaol. Khul khi mail dai ngal-aḡ neḡ, Miḡyail nail geeqlaoḡ eeljaol teevq n nee teevq n mao lal nail khe-ai, aivq bhai tsiqeeq nail tsaol-aḡ mao lal nail ngel-i mail, aivq seiḡleiḡ khaoqsail ya nail ngaol.

¹⁶ Alheel ngel-i mail, nvjuq neema maḡ cov-ail. Nvjuq aḡsivq haḡjoil phao luḡ-ail seil-ail khi ngaol-aoḡ, aḡhaqlal phao teevq n nee teevq n aḡsivq pevq lal thailthaiḡ nail ngaol. ¹⁷ Niil teevq yanḡ nail lavqkhoel nvjuq-i mail ya daḡ nail juḡ neḡ, mao-ail nil mao-ail phai nail ngaol. Niil juḡ neḡ, mao-ail eeḡ mao-ail bhaḡ nail nḡmaḡ maḡlulv halyeel ivq nail seiḡleiḡ khaoqsail nvjuq nail haḡbhoil nl lavq nail ngaol. ¹⁸ Nvjuq neḡ, moel lal nail juḡ bhai heldaiḡ nail maḡ ngel-ail. Maḡ moel lal nail juḡ bhai heldaiḡ nail ngaol. Moel kivq nail juḡ neḡ, teevq yanḡ taivq-ail jiav nail ngaol. Thailhai ngaol-aoḡ, maḡ moel kivq

nail juq neq, nqmaq maqluv halyeel jiaiv nail ngaol.

5

Aqmaol aqlil khi aqsivq nail ganl

¹ Miltsaq kovtavq-ai aqdoevq doevq nail ngadao nail aqmaol niil neq, gaqnaq yavqtsoel khe-ai dul nail ngaol. Gaqnaq yavqtsoel niil cov-ail haq neq, Miqyail-i mail ngadao nail haqbhoil nqtavq kovtavq bhai cov-ai thaq nail ilkhaol jiaiv nail ngaol dai, nvjuq heeq kivq nail ngaol. Nqmaq maqluv halyeel ivq nail ilkhaol al neq, tsaol-aq nail aqlavq-i mail cov-a nail maq ngel-ail. ² Aqmaol niil nail lavqkhoel bhai ngadao jaol-u phao, nqtavq kovtavq-ai jiaiv nail ngadao nail ilkhaol al bhai kovq lai movq deedee-ai bhiq nail ngel-i mail, meel nail ngaol. ³ Ya kovq kev lai haq neq, teevq thal-iq maq cov-ail nia nail jaol duq bhai ya jaol nail ngaol. ⁴ Gaqnaq yavqtsoel khe-ai dul nail aqmaol niil nail lavqkhoel bhai ngadao jaol-u phao, yalkav aqliq phi khi, tev nail meel nail ngaol. Aqmaol aqlil niilniai maq loev ha movq nail ngel-i mail, tev nail meel nail maq ngel-ail. Aqdoevq doevq nail phaqaq neq sil nail phaqaq bhai ya moevq bhoel dai, ngadao aqmaol aqsivq bhai doi movq-ail nial. ⁵ Alhai pevq lal dai, Miqyail ngadao bhai lav sav lavq-a nail ngaol. Yaqhao ngadao geeqlaoq al bhai ya nail ngaol dai, ya heeq kivq dai, niil aq-il nee mail aivq Aqhaqlal Miqyail ngadao nail neema lavqkhoel bhai bhi jaol lee-a nail ngaol.

6 Alheel ngel-i mail, nvjuq aqmaol niil nail lavqkhoel bhai jaol-u phao, Yeiqsul nee mail eq-ai haq nail ngaol dai, heeq kivq khi ngaol-aog, nvjuq khaq mao iqsanl neema ivqdao dai, jiav nail ngaol. 7 Nvjuq neq, maivneev moel moel-ail, aqdoevq doel-aivq nail maq ngel-ail. Neema thaqtsaol thaqtsaol-ail, aqdoevq doevq nail ngaol. 8 Nvjuq neema ivqdao dai, aol nail ngaol. Aqmaol niil nee pav-ail khi Yeiqsul nee jaol lai movq jaiq-ail nial. 9 Alheel ngel-i mail, nvjuq aqmaol niil nail lavqkhoel bhai jaol-u phao maqkhaiq, aqmaol niil nee pav ail-u phao maqkhaiq, Yeiqsul neema tsaq nail tsaol-aq pevq dai, laijai laijai-ail aqdoevq doevq nail ngaol. 10 Khul khi mail dai ngal-aq neq, ngadao yaoq gaq yaoq-ao nee yovqgavq nail aqmaol lavqkhoel bhai jaol-u phao, aqdoevq doevq nail khe-ai, aqmeeq maqkhaiq, maq meeq nail maqkhaiq, ya dai, ngadao Khali nail yalkhaq dal nail doiqbev bev ma nail sivtavq bhai ya kev lai nail ngaol.

Miqyail bhai tsaq lai jil lai dai, nl nail ganl

11 Nvjuq Miqyail bhai ev khi ya geesil nail ngaol dai, heeq kivq nail ngel-i mail, tsaol-aq yaq bhai cavq bhiq deedee nail ngaol. Nvjuq khalheel nail tsaol-aq pevq nail ngel-ail dai, Miqyail bhaqlaoq kheq dai heeq nia nail ngaol. Nuljuq iqsanl, neema lavqkhoel bhai alhai heeq nia nail ngaol dai, nvjuq noeq nail ngaol. 12 Nvjuq niailhai ge nail neq, nuljuq nail sivtavq bhai yovqgavq nail salkhil yovqgavq khanq nail maq ngel-ail dei-eiq. Tsaol-aq teevq pav ganav juq neq, yovqgavq nail neema lavqkhoel bhai

khalhai pevq nail bhai maq saol-nvq dai, lavqniil phao taivq-ail neema eeq nail ngaol. Nuljuq tsaol-aq al juq bhai khalhai ya ge kovq dai, nvjuq bhaqda nee nuljuq neema eeq duq jiav nail ngaol dai, nvjuq gevq bhoel-ai leevq-a nail teevq-eel ngaol. ¹³ Nvjuq naiquq ngel haq neq, Miqyail nail haqbhoil uq ail-a nail ngaol. Nvjuq aqgeel ngel haq neq, nuljuq nail haqbhoil geel nail ngaol. ¹⁴ Khali nail goil nail gaiq-a nail phaqq nvjuq bhai uvthaiq-ai thaqq nail ngaol. Khul khi mail dai ngal-aq neq, tsaol-aq teevq gaqq tsaol-aq iqsanl nail haqbhoil khanqsil-a nail ngel-i mail, tsaol-aq iqsanl sil-aqq nail khe-ai, dul nail ngaol dai, nvjuq noeqceiv-ai thaqq nail ngaol. ¹⁵ Aqdoevq doevq nail tsaol-aq, yovqgavq nail haqbhoil yovqgavq maqq doevq mail, aqyu juqq nail haqbhoil khanq sil khi doevq kovq lal-a nail Khali nail haqbhoil aqdoevq doevq dai, tsaol-aq iqsanl nail haqbhoil aivq khanqsil-a nail ngaol.

¹⁶ Alheel ngel-i mail, yanqgaol nee ngal-aq neq, miltsaqq yaqq juqq saol-nvq nail khe-ai, nvjuq tsaol-aq teevq gaqq bhai iqsanl maqq saol-nvq bhiiq yaoq-aol. Jel lal-u phao, nvjuq Khali bhai miltsaqq yaqq juqq khe-ai, saol-nvq bhiiq khi ngaol-aqq, niil aq-il alhai maqq saol-nvq bhiiq yaoq-aol. ¹⁷ Tsaol-aq teevq gaqq Khali nail lavqkhoel bhai jaol lal haqq neq, aivq tsaol-aq aqsivq pevq lal-a nail ngaol. Aqlil juqq iqsanl mail peivq gil-ail khi, iqsanl mail aqsivq pevq lal-a nail ngaol. ¹⁸ Al juqq iqsanl mail, Miqyail nee mail pevq dov lee-a nail ngaol. Ngadao aivq bhai tsaqq lai jil lai dai, Miqyail Khali bhai juqq khi nl lavq-a nail ngaol. Al ovqtavq, yu aivq bhai tsaqq lai jil lai dai, aivq nvjuq bhai bhi

nl lavq-a nail ngaol. ¹⁹ Miqyail neq, Khali nail lavqkhoel bhai jaol khi, miltsaq yaq aivq bhai tsaq lai jil lai dai, nl-a nail ngaol. Aivq aqyu juq nail oeqbal aqyu juq nail kovtavq bhai maq thaq-al. Alheel ngel-i mail, tsaol-aq yaq ngaq bhai tsaq lal jil lal dai nl yaoq dai, aivq nvjuq bhai khoel lavq-a nail ngaol. ²⁰ Nvjuq Khali nail gaqkhoel pevq nail ngaol. Miqyail nvjuq bhai juq juq-ail nuljuq bhai khul thailthaiq nail ngaol. Miqyail bhai tsaq lal jil lal yaoq dai, Khali nail gaqkhoel pevq khi nuljuq bhai hal nail ngaol. ²¹ Khali neq, oeqbal teevq peivq-ail maq aol khi ngaol-aq, aivq bhaqda nee, ngadao Miqyail nail tsaq nail daol nail pha q pevq lal dai, ngadao nail haqbhoil Miqyail aivq bhai oeqbal bhi pevq lal-a nail ngaol.

6

¹ Nvjuq Miqyail nee mail teevq gaq khe-ai ganl nl nail ngaol. Alheel ngel-i mail, nvjuq nuljuq bhai niailhai hal nail ngaol. Nuljuq Miqyail nail geeqlaoq eeljaol bhai hav bhoel-a nail al aqnieivq-ail tha q bhi pevq-ail. ² Khul khi mail dai ngal-aq neq, aivq ge nail:

“Aqyanq tsaq-u phao,
ngal naoq nail daoq bhai
naldaiq-a nail ngaol.
Hevqkovq nail aqn al n bhai
ngal naoq bhai
tsaojao-ai bhiq naol” dai,
ge-ai tha q nail ngaol.

Nil aq-il neq, aqyanq tsaq nail ngaol. Yanqgaol neq, hevqkovq nail aqn kev lee-aq nail ngaol.

Khoeq nail jiovq nail phaqaq bhai khalhai ya daq nail ganl

³ Nvjuq ganl nl nail bhai yu oeqbal thaqaq duq maq jiav dai, nvjuq teevq gaq bhai iqsanl phaqaqthiq maq bhi thiq-ail. ⁴ Yu nvjuq bhai maldil Miqyail nail ganl nl nail tsaol-aq nial dai, heeq nia dai, yaoq phaqaq yaoq-aq nee nail lavqkhol-ai nvjuq nl nail ngaol. Ol deede nail, ya daq deede nail, noeq dee noeq deel nail, ⁵ yu-i mail dee lavq nail, thaonq bhai laol lavq nail, yu lav suqsaq lal nail, ganl ya nl deede nail, maq ya iqthaiq nail dai khi, moevq nail sivq nail, nvjuq niil juq bhai daq daq-ail nl-a nail ngaol. ⁶ Meeq nail haol nail neema aol nail, neeno eq neekha aol nail, neeno eq heelma ma dai noeq nail, aqmeeq phaqaq aol nail, Meeqnail Haolnail Aqhaqlal bhai juq nail, neema lavqkhol bhai kev dai gaiq-a nail, ⁷ maldil tsaq nail daoq bhai cavq bhiq nail, Miqyail nail bhaqaq bhai juq nail, tsaq nail daol nail khi kha-aq bhai lavqtsel lavqmal nieivq thaiq khi ganl nl nail ngaol. ⁸ Khaoqsail ya nail maqkhaiq, yu-i mail khal nl movq-ail nl lavq nail maqkhaiq, yu-i mail tsiqeeq lavq nail maqkhaiq, yu-i mail ge doil lavq nail maqkhaiq, nvjuq nl nail ngaol. Yu bhai goiqbhaoq bhaoq jaq nail tsaol-aq ngaol dai, yu nvjuq bhai saol-nvq lavq khi ngaol-aq, nvjuq maldil tsaq nail phaqaq nl nail ngaol. ⁹ "Nuljuq bhai maq heeq kivq-ail" dai, yu nvjuq bhai saol-nvq lavq khi ngaol-aq, tsaol-aq iqsanl mail nvjuq bhai heeq nia nail ngaol. Sil heeq phaqaq-ail pevq ail-a nail tsaol-aq ngaol dai, yu nvjuq bhai saol-nvq lavq khi ngaol-aq, aqdoevq doevq

nail tsaol-aq ngaol. Khoeq lavq jiovg lavq-a nail bhai ya daq nail tsaol-aq khe-ai pevq khi ngaol-aog, heivq lavq nail bhai maq ya daq-ail. ¹⁰ Noeqhaq nail tsaol-aq khe-ai pevq khi ngaol-aog, khaq mao iqsanl lavqkhiq tsail nail ngaol. Haq nail aog nail tsaol-aq khe-ai pevq khi ngaol-aog, tsaol-aq maodai bhai hulmeeq bhiq meeq lal nail ngaol. Khul teevq phaqa-ail maq jiaiv nail tsaol-aq khe-ai pevq khi ngaol-aog, yaoq phaqa yaoq-ao nee jiaiv nail tsaol-aq ngaol.

¹¹ Gaolliqthu meenq bhai jaol nail juq-ol, nvjuq nuljuq bhai yaoq phaqa yaoq-ao nee bhaqlaoq kheq dai cavq bhiq-a nail ngaol. Nvjuq nail neema lavqkhoel-ai nuljuq iqsanl bhai gaiq-a deede naol. ¹² Nvjuq nail neema lavqkhoel-ai nuljuq bhai gaiq-a nail phaqa micil teevq-eel maq ngel-ail. Thailhai ngaol-aog, nuljuq nvjuq bhai gaiq-a nail neq, micil teevq-eel ngaol. ¹³ Nuljuq iqsanl nvjuq bhai gaoq gaiq-a lavq yaoq. Niailhai ge nail neq, yovqgavq nail yaq bhai ge bhiq nail khe-ai, ge nail ngaol.

Ngadao neq, aqdoevq doevq nail Miqyail nail uqhuq thaoq nail ilkhaol il ma ngaol

¹⁴ Khali bhai neema maq thaqtsaol nail tsaol-aq nee thaqa tavq laiq. Khul khi mail dai ngal-aq neq, tsaq nail daol nail phaqa neq, maq tsaq maq daol nail phaqa bhai khalhai khi tavq lai nia nail-aiq. Aqphaqa khi mail aqnav khalhai khi aqtsaog tsaog nia nail-aiq. ¹⁵ Khali neq, neivq heeqphaqa bhai khalhai khi tsaq lai jil lai nia nail-aiq. Khali bhai neema thaqtsaol nail tsaol-aq, neema maq thaqtsaol nail tsaol-aq nee mail,

neema teevq heeq taivq-ail khalhai khi tavq kivq
 nail-aiq. ¹⁶ Miqyail nail uqhuq thaoq nail ilkhaol
 il ma khi thaoqphaoq aqma maolkhoel khalhai
 khi tsaq lai jil lai nia nail-aiq. Ngadao neq,
 aqdoevq doevq nail Miqyail nail uqhuq thaoq
 nail ilkhaol il ma ngaol. Miqyail niailhai ge-ai
 thaq nail ngaol:

“Ngal aqyu juq nail
 lavqkhoel bhai jaol khi,
 aqyu nail lavqkhoel bhai
 tsao nail ngaol.

Ngal aqyu juq nail
 Miqyail pevq khi,
 aqyu juq ngaq nail tsaol-aq
 pevq nail ngaol” dai,
 ge-ai thaq nail ngaol.

¹⁷ Alheel ngel-i mail,
 “‘Aqyu juq nail
 lavqkhoel nee dov lal khi
 aqyu juq bhai
 gaoqceiv ceiv yaoq’ dai,
 Heeqphaq Miqyail
 ge nail ngaol.

‘Aqcavq pha q bhai
 thaq thoiq.
 Maq thoiq haq neq,
 ngal nuljuq bhai
 hav bhoel naol.

¹⁸ Ngal nuljuq nail
 Aqbhu pevq khi,
 nuljuq ngaq nail yaqmiq
 yaqyov pevq lal nail ngaol’ dai,
 iqsanl nail kovtavq bhai

uvthaiq nail bhaqaoq eeq nail
Heeqphaq Miqyail
ge nail ngaol.”

7

¹ Ngal mao-ail gaiq-a nail aqtsaoq juq-ol, ngadao saljial al juq bhai ya-ai thaq nail ngel-i mail, ngadao nail aqmaol khi aqhaqlal bhai bhi jiiqv bhiq cavq-ail nia nail yaoq pha q yaoq-ao nee bhai tsiqhaol khi, Miqyail bhai ev khi geesil nail lavqkhoel aqmeeq aqhaol haol nail pha q teevq bhee aol dai doevq bhel.

*Aqyu juq oeqbal noeq pov-a nail ngel-i mail,
Paolluv lavqkhiq tsail nail ganl*

² Neema lavqkhoel nee nvjuq bhai hav lavq yaoq. Nvjuq tsaol-aq teevq gaq bhai iqsanl maq nl lai q-al. Teevq gaq bhai iqsanl maq gaq jaq-al. Teevq gaq bhai iqsanl goiqbhaoq maq bhaoq daiq-al. ³ Ngal nuljuq nail kovtavq bhai oeqbal tha q tha q-ail nia ilhai ge nail maq ngel-ail. Sil khi ngaol-a oq, teevq gaq khe-ai ya sil dai, doevq khi ngaol-a oq, teevq gaq khe-ai ya doevq dai, nvjuq nail neema lavqkhoel bhai nuljuq bhai gaiq-a-ail nial dai, aq-u phao iqsanl, ngal nuljuq bhai ge bhiq-a nail ngaol. ⁴ Ngal nuljuq bhai aqmeeq-ai neema tha qtsaol nail ngaol. Nuljuq bha qda nee ngal neekhaol sil duq jia v nail ngaol. Nuljuq bha qda nee ga q eeq duq iqsanl jia v nail ngaol. Nvjuq ya da q deede u phao iqsanl, maq ge gil tsaol dai ngal lavqkhiq tsail-ail nial.

⁵ Nvjuq Maqgeiqdaolnil milkhaoq bhai lal kev-u phao, teevq thal-iq gaqnaq naq nail maq dan-ail. Nvjuq yaoq pha q yaoq-ao nee nail lavqkhoel, mao-ail suqsaq nail pha q ya daq nail ngaol. Jaoq jaoq-ai iqdaiq iqtsai dov lal thailthaiq khi, neema lavqkhoel bhai geesil nail pha q iqsanl aol-ail ceevq-a nail ngaol. ⁶ Thailhai ngaol-aoq, neema cov nail tsaol-aq bhai bhi noeqsal lal nail Miqyail neq, Tiltuv lal kev-u phao, nvjuq bhai bhi noeqsal lal-a nail ngaol. ⁷ Tiltuv lal kev-a nail ngel-i mail taivq-ail, noeqsal lal-a nail maq ngel-ail. Aivq nuljuq nee mail jaol-u phao, noeqsal-a nail ngel-i mail, nvjuq iqsanl noeqsal-a nail ngaol. Nuljuq ngaq bhai moel movq deedee nail bhai maqkhaiq, pevq jel-ail ceevq-a nail ganl bhai nuljuq khadai noeqhaq nail bhai maqkhaiq, nuljuq ngal jaol nail phao aol movq nail neema kev deedee nail bhai maqkhaiq, aivq ge daiq lavq-a nail ngel-i mail, ngal lavqkhiq tsail jaiq lal-a nail ngaol.

⁸ Ngaq-i mail nuljuq bhai gevq bhiq-a nail haoqgavq al keiv nuljuq bhai bhi noeqhaq-a nail ngel-i mail, iqmoeq-u phao ngal noeqhaq khi ngaol-aoq, niil aq-il neq, maq noe q haq yaoq-aol. Khul khi mail dai ngal-aq neq, haoqgavq al keiv nuljuq bhai teevq yanq taivq-ail bhi noeqhaq-a nail bhai, ngal ya moel-a nail ngaol. ⁹ Ngal nuljuq bhai bhi noeqhaq-a nail ngel-i mail, lavqkhiq tsail nail maq ngel-ail. Nuljuq oeqbal noe q pov-u phao kev dai, noeqhaq nail ngel-i mail, lavqkhiq tsail-ail nial. Nvjuq bhaqda nee nuljuq geeqlaoq teevq peivq-ail maq ya sunq-ail dai, nuljuq Miqyail nee mail dov lee-a nail noe qhaq

nail phaḡ bhai ya daḡ nail ngaol. ¹⁰ Miḡyail nee mail dov lee-a nail noeḡhaḡ nail phaḡ neḡ, hevḡkovḡ nail phaḡ ya-u phao kev dai, oeḡbal noeḡ pov nail phaḡ bhi dov lal-a nail ngaol. Alhai bhi dov lal haḡ neḡ, noeḡhaḡ noeḡaoḡ nail phaḡ maḡ jiaḡ yaoḡ-aol. Thailhai ngaol-aḡ, miltsaḡ nee mail dov lal-a nail noeḡhaḡ nail phaḡ neḡ, sil nail phaḡ pevḡ nail ngaol. ¹¹ Miḡyail nee mail dov lee-a nail noeḡhaḡ nail phaḡ neḡ, neema lavḡkḡhoel bhai khul phaḡ bhi dov lal nail ngel-ail dai, saol-nvḡ daiḡ yaoḡ. Nuljuḡ laijai movḡ deedeē nail neema aol lal-aḡ nail ngaol laḡ. “Nvjuḡ daolcoev dai, nl nail hal nail ngaol” dai, nuljuḡ ge kovḡ lavḡ nail ngaol. Nuljuḡ neema phail nail phaḡ maḡkḡhaiḡ, geesil nail phaḡ maḡkḡhaiḡ, ngaḡ bhai moel movḡ deedeē lal-a nail maḡkḡhaiḡ, neema kev nail phaḡ aol lal-a nail maḡkḡhaiḡ, dal lavḡ nail phaḡ maḡkḡhaiḡ, niil juḡ nuljuḡ nail lavḡkḡhoel bhai khadai kev dai, nl dol lavḡ nail-aiḡ. Ganl niilniai tavḡ nail yaoḡ phaḡ yaoḡ-ao nee nail lavḡkḡhoel nuljuḡ oeḡbal maḡ aol-ail dai, bhaḡlaḡḡ kheḡ dai bhi dov lal-a nail ngaol. ¹² Alheel ngel-i mail, ngal nuljuḡ bhai haoḡgavḡ gevḡ bhiḡ-a nail neḡ, nl laiḡ-a nail tsaol-aḡ nail haḡbḡhoil maḡ ngel-ail. Yu-i mail nl laiḡ nail bhai ya daḡ nail tsaol-aḡ nail haḡbḡhoil iḡsanl maḡ ngel-ail. Miḡyail nail sivtavḡ bhai nuljuḡ nvjuḡ nail haḡbḡhoil khadai laijai nail ngel-ail dai, nuljuḡ heeḡ nia dai, gevḡ bḡhoel-ai leevḡ-a nail ngaol. ¹³ Alheel ngel-i mail, nvjuḡ bhai noeḡsal lal-a nail ngaol. Nvjuḡ noeḡsal lal-a nail nee ovḡtavḡ, Tiltuv lavḡkḡhiḡ tsail nail ngel-i mail, nvjuḡ a dai nee maḡtsil

lavqkhiq tsail lal-a nail ngaol. Nuljuq iqsanl mail, aivq bhai bhi noeqsal lal-a nail ngaol. ¹⁴ Nuljuq bhai tsiqeeq-a nail daoq ngal Tiltuv bhai ge bhiq-ai thaq nail al, niil aq-il ngal maq ya haqsil-ail. Nvjuq nuljuq bhai yaoq daoq yaoq-ao nee daolcoev dai, ge bhiq-a nail khe-ai, Tiltuv nail sivtavq bhai ngal nuljuq bhai tsiqeeq-a nail al neq, tsaq deedee nail ngaol. ¹⁵ Nuljuq iqsanl mail aivq nail daoq naldaiq nail nee ovqtavq, geesil khi aqjuq juq nail lavqkhoel nee aivq bhai hav bhiq-a nail bhai, aivq noeq dov lal-u phao, aivq nuljuq bhai gaiq-a jaiq lal thailthaiq nail ngaol. ¹⁶ Yaoq pha q yaoq-ao nee nail lavqkhoel-ai ngal nuljuq bhai neema thaqtsaol kivq nail ngel-i mail, lavqkhiq tsail-ail nial.

8

Khali yaq nail haqbhoil phul danq nail ganl

¹ Aqivq jaqbheq juq-ol, Maqgeiqdaolnil milkhaoq bhai jaol nail Khali yaq munl juq bhai Miqyail geeqlaoq eeljaol bivq nail ganl, nvjuq nuljuq bhai bhi heeq kivq movq-ail nial.

² Aqyu juq neq, khoeq nail jiovq nail pha-q-i mail laonqdaiq nail pha q bhai ya daq khi ngaol-aoq, aqyu juq haq nail aoq nail bhai maq saol-nvq dai, lavqkhiq tsail nail ngel-i mail, maodai danq-a nail ngaol. ³ Aqyu juq khal khi kivq nail khe-ai, danq nail nee ovqtavq, a dai nee maqtsil iqsanl lavqkhiq teevq tsail gaoq danq-a nail ngaol dai, ngal salkhil khanq nail ngaol. ⁴ “Miqyail nail tsaol-aq bhai tsaojao-ai nia nail geeqlaoq al nvjuq bhai bhi nl lavq yaoq”

dai, aqyu juq nvjuq bhai hal deedee nail ngaol. ⁵ Nvjuq-i mail noeqthunq nail nee maqtsil, aqyu juq nl nail ngaol. Miqyail neema tsaq nail khe-ai, aqyu juq iqmoeq-u nee mail yovqgavq nail aqmaol yovqgavq Yeiqsul bhai av bhiq-a nail nee ovqtavq, nvjuq bhai iqsanl av lavq-a nail ngaol. ⁶ Alheel ngel-i mail, “Naoq-i mail aqyu juq nail lavqkhoel bhai iqmoeq ilmoeq nl-ai thaq nail khe-ai, geeqlaoq eeq nail ganl al nl gil yaoq” dai, nvjuq Tiltuv bhai hal-a nail ngaol. ⁷ Nuljuq neq, neema thaqtsaol nail pha q maqkhaiq, ge nail thail nail pha q maqkhaiq, neenoeq neekha maqkhaiq, laijai deedee nail pha q maqkhaiq, nvjuq bhai gaiq-a nail pha q maqkhaiq, mee nia pha q nl bhee thailthaiq nail khe-ai, geeqlaoq eeq nail ganl niilniai iqsanl nl bhee yaoq.

⁸ Ngal niailhai ge nail neq, daoq bivq nail maq ngel. Ngal yu laijai nail ganl ge-u phao, nuljuq goil nail gaiq-a nail pha q maldil aol nail ngaol dai, dov lal dai, ge nail ngaol. ⁹ Nuljuq ngadao nail Heeqphaq Yeiqsul Khali nail geeqlaoq eeljaol bhai heeq nia nail ngaol. Aivq hulmeeq meeq khi ngaol-aq, nuljuq nail haqbhoil haq nail pha q bhai daq-a nail ngaol. Aivq haq nail al bhai daq-a nail ngel-i mail, nuljuq hulmeeq meeq lal-a nail ngaol.

¹⁰⁻¹¹ Ganl niil ngal noeq nail khe-ai, nuljuq bhai ge bhiq nail ngaol dei-eiq. Nuljuq milnee kovq nee nl-ai thaq nail al niil aq-il nl gaq yaoq. Niil neq, nuljuq nail haqbhoil meeq deedee nail ngaol. Aq-u phao neq, nuljuq yu nail iqmoeq-u nee, nl movq nail neema aol nail ngaol. Alhai dul dai, nuljuq khal khi kivq nail khe-ai, haoqnao

naosaq bhai kev dai, nl yaoq. ¹² Danq movq nail neema aol khi danq haq neq, Miqyail hav bhoel nail ngaol. Maq jiav nail bhai bivq lavq yaoq dai, Miqyail maq ge-ail.

¹³ Ganl niil nl-u phao, yu nail haqbhoil maq haq khi ngaol-aoq, nuljuq nail haqbhoil haq dai, ngal nl movq nail maq ngel. Teevq gaq khe-ai di dai, nl movq-ail nial. ¹⁴ Niil aq-il nuljuq al jaiq jiav nail lavqkhoel aqyu juq maq jiav lovq nail pha q bhai nuljuq tsaojao-ai bhiq nail ngaol. Yaqhao nuljuq maq jiav lovq nail pha q bhai, aqyu juq al jaiq jiav nail lavqkhoel nee nuljuq bhai tsaojao-ai lavq khi, teevq gaq khe-ai di lal nail ngaol. ¹⁵ Jalliq lavqkhoel bhai gevq-ai tha q nail khe-ai,

“Maodai gov bhoel-a nail tsaol-aq, al jaiq maq jiav-ail. Micil taivq-ail gov bhoel-a nail tsaol-aq, lovq nail ngaol” dai, gevq-ai tha q nail ngaol.

Tiltuv khi aivq nail ganl nl tsa o q ju q nail ganl

¹⁶ Ngal nuljuq nail haqbhoil neema kev nail khe-ai, Tiltuv iqsanl neema kev lal dai, Miqyail nl bhiq-a nail ngel-i mail, ngal Miqyail bhai tsiqeeq nail ngaol. ¹⁷ Tiltuv neq, nvjuq-i mail ga q bivq nail dao q bhai naldaiq nail nee ovqtavq, aivq neema kev deedee nail ngel-i mail, aivq bhai aivq noeq dov lal bhiq khi nuljuq jaol nail bha lee nail ngaol. ¹⁸ Lavqkhiq tsail nail geeqlaoq dao q cavq nia deedee nail ngel-i mail, Khali ya q munl iqsanl mail tsiqeeq nail aqivq jaqbheq teevq ga q iqsanl nvjuq Tiltuv nee mail bhi lee nail ngaol. ¹⁹ Aqivq jaqbheq niil ga q neq, “Paolluv nee mail tsa o the jaol nail ju q nail haoqnao tsa o the tsa o the-ail

geeqlaog eeq nail phul danq nail ganl niil nl ail yaoq” dai, Khali yaq munl juq-i mail tsel dov khi khoel-ai thaq nail gaq ngaol. Miqyail nail seiqleiq khaoqsail dov lal khi, yu bhai tsaojao-ai bhiq movq nail neema bhaqlaog kheq dai bhi dov lal nail dai khi, nvjuq ganl niil nl thailthaiq nail ngaol. ²⁰ Khali yaq juq-i mail danq-ai thaq nail, mao-ail mao nail phul al nvjuq oil khi bhoil bhiq ail-u phao, yu nvjuq nail kovtavq bhai oeqbal maq ya thaq dai, yaolphaol nail ngaol. ²¹ Khul khi mail dai ngal-aq neq, Miqyail nail siltavq bhai taivq-ail maq ngel nail. Tsaol-aq yaq nail siltavq bhai iqsanl aqsee aqdaol daol-ai nl kivq dai, nvjuq noeqceiv khi nl thailthaiq nail ngaol.

²² Aqyu nvq gaq nee mail aqivq jaqbheq yaoq gaq yaoq iqsanl nuljuq jaol nail bha bhi lee nail ngaol. Aqivq jaqbheq al gaq bhai mee nia phaog nail lavqkhoel nee, mee nia pov laongdaiq-a nail ngaol. Aivq neq, neema kev deedee nail teevq gaq ngaol dai, nvjuq ya heeq kivq-a nail ngaol. Aivq nuljuq bhai neema thaqtsaol deedee nail ngel-i mail, niil aq-il neema kev jaiq lal-a nail ngaol. ²³ Tiltuv khi mail aqivq jaqbheq niil nvq gaq nail ganl neq, niailhai ngaol. Tiltuv ngaq nail aqtsaog pevq khi, nuljuq nail haqbhoil ngaq-ai nee mail ganl nl nail tsaol-aq ngaol. Khali yaq munl juq-i mail aqivq jaqbheq niil nvq gaq bhai khoel-ai leevq-a nail ngaol. Aqyu nvq gaq neq, Khali nail seiqleiq khaoqsail bhi dov lal nail tsaol-aq ngaol. ²⁴ Alheel ngel-i mail, nuljuq goil nail gaiq-a nail neema aol-ail nial dai, aqyu juq heeq nia dai, nl bhiq yaoq. Nvjuq-i mail

nuljuq nail ganl tsaol-aq niil juq nail sivtavq bhai tsiqeeq-a nail daoq al daoq tsaq lao thaq nial dai, aqyu juq heeq nia dai iqsanl, Khali yaq munl nail sivtavq bhai nl yaoq.

9

Khali yaq juq bhai tsaojao-ai bhiq nail ganl

¹ Yuldav milkhaoq bhai jaol nail Miqyail nail tsaol-aq juq bhai tsaojao-ai bhiq nail ganl al ngal nuljuq bhai haoqgavq gevq bhoel-ai leevq nail maq loq-ail. ² Khul khi mail dai ngal-aq neq, nuljuq yu bhai tsaojao-ai movq nail neema aol nail ngaol dai, ngal heeq kivq naol. “Aqyu juq yu bhai tsaojao-ai movq nail neema aol nail ngaol” dai, ngal Maqgeiqdaolnil milkhaoq bhai jaol nail juq bhai ge bhiq-a nail nee ovqtavq, ngal nuljuq bhai tsiqeeq nail ngaol. “Aqgaqyal milkhaoq bhai jaol nail juq neq, milnee kovq nee mail lainq-ai thaq nail ngaol” dai, ngal aqyu juq bhai ge bhiq-a nail ngaol. Nuljuq-i mail laijai deede nail pha q neq, aqyu juq jemaovq teevq pav nl movq nail neema aol lal dai, bhi noeq dov lal-a nail ngaol. ³ Nuljuq-i mail nl nail ganl bhai ngal tsiqeeq thailthaiq nail niil, aqnieivq-ail maq ya pevq nail nee ovqtavq, ngaq-i mail ge nail khe-ai, nuljuq aqmeeq-ai lainq-ai thaq nia dai, aqivq jaqbheq niil juq bhai khoel-ai leevq nail khi ngaol. ⁴ Alhai maq ngel haq neq, Maqgeiqdaolnil milkhaoq bhai jaol nail tsaol-aq teevq pav ganav juq ngaq-ai nee mail teevq gaq khe-ai lee-u phao, nuljuq maq lainq-ai thaq nail bhai ya moel haq neq, nvjuq nuljuq bhai

neema thaqtsaol nail ngel-i mail, nuljuq taivq-ail ya haqsil nail maq ngel-ail. Nvjuq iqsanl ya haqsil nail ngaol. ⁵ Alheel ngel-i mail, ngal maq kev lee-u nee mail, iqmoeq-u nee ge-ai thaq nail geeqlaoq eeq nail phul danq nail ganl al bhai aqmeeq-ai tsaol nl gil yaoq dai, ngal aqivq jaqbheq niil hail gaq bhai khoel-ai leevq nail neq, tsaq nail ngaol dai, noe q nail ngaol. Nuljuq alhai danq-u phao, maq danq-ail maq khi kivq nail ngel-i mail danq nail maq ngel mail. Lavqkhiq teevq tsail danq movq nail neema aol khi danq nail bhai ngal oil movq-ail nial.

⁶ Micil taivq-ail haiq nail gaq, micil taivq-ail ya gaiq nail ngaol. Maodai haiq nail gaq maodai ya gaiq nail ngaol dai, ge nail daoq al daoq bhai thaq nioilpeivq. ⁷ Yaoq gaq yaoq-ao nee, yovqgavq nail neema lavqkhoel-ai yovqgavq noe qceiv-ai thaq nail khe-ai danq yaoq. Neema maq kev dai, danq nail maqkhaiq, yu khoel nail ngel-i mail danq nail maqkhaiq, neema alhai aol aol-ail thaq danq. Khul khi mail dai ngal-aq neq, lavqkhiq teevq tsail danq nail tsaol-aq bhai Miqyail gaiq-a nail ngaol. ⁸ Nuljuq khaq mao iqsanl yaoq pha q yaoq-ao nee jiav lovq nail nee ovqtavq, aqmeeq yaoq pha q yaoq-ao nee nl nia hal nia dai, Miqyail nuljuq bhai geeqlaoq yaoq pha q yaoq-ao nee teevq bhee bivq nia nail ngaol. ⁹ Jalliq lavqkhoel bhai gevq-ai thaq nail khe-ai,
 “Haq nail aoq nail
 juq nail haqbhoil
 maodai danq bhiq-a nail
 tsaol-aq al gaq,
 aivq nail tsaq nail daol nail

al phaḡ neḡ,
nḡmaq maḡluv halyeel
ivḡ nail ngaol” dai,

geḡvḡ-ai thaḡ nail ngaol.

¹⁰ Aḡiq haiḡ nail ḡaḡ bhai aḡiq iḡsanl, jaḡjaḡ daoldaol iḡsanl, bivḡ nail Miḡyail, nuljuḡ bhai aḡiq bivḡ lavḡ nail ngaol. Nuljuḡ-i mail haiḡ-ai thaḡ nail aḡiq al heeḡ lee lov lee khi, tsaḡ nail daol nail phaḡ maodai ya ḡaiḡ dai, aivḡ bhi mao lal nail ngaol. ¹¹ Yaoḡ phaḡ yaoḡ-ao nee nail haḡbhoil nuljuḡ maodai bivḡ nia dai, iḡsanl nail lavḡkhoel-ai Miḡyail nuljuḡ bhai hulmeeḡ bhi meeḡ lal nail ngaol. Alheel ngel-i mail, Yuldav milkhaoḡ bhai jaol nail Miḡyail nail tsaol-aḡ juḡ, ngadao maodai bivḡ nail bhai heldaiḡ khi, Miḡyail bhai tsiḡeeḡ nail ngaol.

¹² Khul khi mail dai ngal-aḡ neḡ, Miḡyail nail tsaol-aḡ bhai tsaojao-ai bhiiḡ nail ḡanl al neḡ, aḡyu juḡ loḡ nail khe-ai, teevḡ bhee tsaojao-ai bhiiḡ nail teevḡ-eel maḡ ngel-ail. Aḡyu juḡ Miḡyail bhai lavḡkhiḡ teevḡ tsail tsiḡeeḡ jaiḡ nia lal dai iḡsanl nl nail ngaol. ¹³ Nuljuḡ aḡyu juḡ bhai tsaojao-ai bhiiḡ nail bhai aḡyu juḡ heldaiḡ khi, nuljuḡ khalheel nail tsaol-aḡ ngel-ail dai, aḡyu juḡ heeḡ nia nail ngaol. Khul khi mail dai ngal-aḡ neḡ, nuljuḡ Khali nail lavḡkhiḡ tsail nail geeḡlaoḡ daoḡ bhai hav bhoel khi, al nail haoḡnao tsaothe nail ngel-i mail maḡkhaiḡ, aḡyu juḡ bhai iḡsanl, yu bhai iḡsanl nuljuḡ maodai danḡ bhiiḡ-a nail ngel-i mail maḡkhaiḡ, aḡyu juḡ Miḡyail bhai thaḡeeḡ thaḡheel nail ngaol. ¹⁴ Miḡyail nuljuḡ bhai mao-ail meeḡ nail geeḡlaoḡ bivḡ lavḡ-a nail ngel-i mail, aḡyu juḡ

nuljuq nail haqbhoil khaq mao iqsanl geeqlaoq hal-u phao, nuljuq bhai noeq kev deedee nail ngaol. ¹⁵ Maq ge gil tsaol nail kovpavq Miqyail bivq lavq-a nail ngel-i mail, aivq bhai tsiqeeq bhel.

10

Paolluv aivq-i mail ganl nl-a nail ganl gevq-a nail

¹ Ngal neq, Paolluv ngaol. Khali nail neenuq neebeiv khi mail aivq nail neema meeq deedee nail lavqkhoel nee, ngal nuljuq bhai hal nail ngaol. Nvjuq nee mail jaol-u phao, neema neenuq neebeiv aol khi, nvjuq nee mail maq jaol-u phao, geesil nail neema maq aol-ail dai, nuljuq-i mail ge nail al gaq ngal ngaol. ² “Aqyu juq neq, aqsivq haqjoil nail haoqnao taivq-ail tsaothe nail tsaol-aq ngaol” dai, nvjuq bhai saol-nvq lavq nail tsaol-aq bhai geesil nail neema maq aol dai, nl daiq bhiq naol dai, ngal noeqceiv-ai thaq nail ngaol. Thailhai ngaol-aq, ngal nuljuq jaol nail bha kovq lal-u phao, niidai dai-ail geesil nail neema aol khi mail maq ya nl daiq bhiq dai, ngal nuljuq bhai hal nail ngaol. ³ Nvjuq neq, miltsaq kovtavq-ai aqdoevq doevq khi ngaol-aq, miltsaq bhai tavq nail genl dev nail tsaol-aq genl dev nail khe-ai, nvjuq genl dev nail maq ngel-ail. ⁴ Nvjuq genl dev-u phao, yuq nail khen kha-ao neq, miltsaq bhai tavq nail maq ngel-ail. Tavq bhai lav cov nail haqbhoil, Miqyail nail bhaqaoq aol nail khen kha-ao ngaol. ⁵ Nvjuq neq, jil pheeljaq nail pha q bhai maqkhaiq, Miqyail bhai maq ya heeq nia dai, lav tsoiq nail yaoq

phaq yaoq-ao nee bhai maqkhaiq, khaonq ha thailthaiq nail ngaol. Tsaol-aq nail neenoeq iqsanl bhai pheethaiq khi Khali nail daoq bhai taivq-ail bhi naldaiq nail ngaol. ⁶ Nuljuq ngaq nail daoq naldaiq khi ngal jaol nail phao aol lal gaq haq neq, maq naldaiq nail juq bhai geel-nvq nail khe-ai, yalkhaq dal bhiq nail ngaol dai, lainq-ai thaq nail ngaol.

⁷ Nuljuq neq, kovtavq phao taivq-ail heldaiq nail niil laq. Tsaol-aq teevq gaq ganav yovqgavq bhai yovqgavq, “Ngal neq, Khali nail tsaol-aq ngaol” dai, saol-nvq haq neq, aivq Khali nail tsaol-aq pevq nail khe-ai nvjuq iqsanl Khali nail tsaol-aq ngaol dai, aivq noeq kev heeq pha-q-ail tsaq nail ngaol. ⁸ Nuljuq bhai bhi eeq bhi heel lal nail dai khi, Heeqphaq Yeiqsul nvjuq bhai alyaq bivq lavq-a nail ngaol. Nuljuq bhai bhi lav cov nail dai khi, bivq lavq-a nail maq ngel-ail. Alheel ngel-i mail, alyaq niil nail ganl ngal neema eeq eeq-ail ge jel khi ngaol-aoq, ngal ya haqsil nail maq ngel-ail. ⁹ Nuljuq bhai lav geesil movq nail niil dai, bhiq noeq movq nail ngel-i mail, ngal haoqgavq niil gevq bhoel-ai lavq-a nail, maq ngel-ail. ¹⁰ “Paolluv-i mail gevq-a nail haoqgavq neq, bhaqaoq eeq deede kxi haq deede kxi ngaol-aoq, aivq nail aqmaol nvjuq nee mail jaol-ail nul neq, khul maq ge tseq nail tsaol-aq pevq khi, aivq neq, daoq mao-ail maq ge nia-il” dai, tsaol-aq teevq pav ganav juq ge nail ngaol. ¹¹ Nvjuq nuljuq nee mail maq jaol-u phao, nuljuq bhai haoqgavq gevq bhoel-ai leevq-a nail khe-ai, nvjuq nuljuq nee mail jaol-u phao iqsanl, alhai nl nail ngaol dai, tsaol-aq al juq bhai bhi

heeq nia yaoq.

¹² Yovqgavq nail salkhil yovqgavq khanq nail tsaol-aq nail munl lavqkhoel bhai saol-nvq bhoel nail maqkhaiq, aqyu juq bhai tsiqceiv daiq nail maqkhaiq, nvjuq maq nl tseq-ail. Aqyu juq neq, teevq gaq nee teevq gaq tsiqceiv daiq khi, yovqgavq bhai yovqgavq tsiqeeq nail ngel-i mail, neenoeq neekha maq aol nail tsaol-aq ngaol.

¹³ Thailhai ngaol-aq, nvjuq neq, neema eeq eeq-ail al jaiq maq ge-ail. Miqyail nvjuq bhai ganl bhoil lavq-a nail aqduq al juq bhai taivq-ail neema eeq khi, nvjuq nl thailthaiq nail ngaol. Nuljuq neq, aivq-i mail nvjuq bhai bhi nl lavq-a nail aqduq al juq nail lavqkhoel bhai jaol nail ngaol. ¹⁴ Miqyail-i mail nvjuq bhai bhi nl lavq-a nail aqduq al juq nail lavqkhoel bhai nuljuq jaol nail ngel-i mail, nvjuq yaoq juq yaoq bhai nl bhoel-aivq-a nail maq ngel-ail. Khul khi mail dai ngal-aq neq, Khali nail lavqkhiq tsail nail geeqlaoq daoq nuljuq jaol nail bha kev lee dai, iqmoeq ilmoeq cavq lee-a nail juq neq, nvjuq ngaol. ¹⁵ Yu-i mail nl-ai thaq nail ganl bhai nvjuq-i mail nl-ai thaq nail khe-ai tavq khi, neema eeq nail lavqkhoel nee ge nail maq ngel. Nuljuq neema thaqtsaol nail phaqq eeq lal mao lal-a nail khe-ai, nuljuq nail lavqkhoel bhai, Miqyail nvjuq bhai bhoil lavq-a nail aqduq iqsanl eeq lal mao lal dai, nvjuq noeqthunq nail ngaol. ¹⁶ Alhai pevq lal haq neq, nuljuq nail jaol duq a phao bal-nvq bhai kev dai, nvjuq lavqkhiq tsail nail geeqlaoq daoq cavq kivq nail ngaol. Aq-u phao, yu-i mail nl-ai thaq nail ganl bhai neema eeq eeq-ail nvjuq teevq peivq-ail maq ge-ail. ¹⁷ Thailhai

ngaol-aog, “Neema eeq nail tsaol-aq, Heeqphaq Miqyail nail lavqkhoel bhai taivq-ail eeq dei-eiq.”
 18 Khul khi mail dai ngal-aq neq, yovqgavq nail ganl yovqgavq salkhil khanq nail tsaol-aq bhai, Miqyail neekhaol sil nail maq ngel-ail. Miqyail-i mail salkhil khanq nail tsaol-aq bhai taivq-ail, aivq neekhaol sil nail ngaol.

11

Paolluv khi mail maq ngel nail gaqkhoel juq

1 Ngal nuljuq bhai gevq bhoel-ai leevq-a nail yaqjaog khaqlal miqthoi nail daoq bhai nuljuq micil bhi ol movq-ail nial. Teevq pov ol lavq dei-eiq. 2 Miqyail nuljuq bhai gaiq-a deede nail khe-ai, ngal iqsanl nuljuq bhai gaiq-a deede-ail nial. Khul khi mail dai ngal-aq neq, meeq nail haol nail yaqmai-aq yaqnoil khe-ai pevq khi Khali bhai taivq-ail bhi maol ail nail dai khi, ngal nuljuq-ai aivq nail aqlavq lavqkhoel bhai av bhiq-a nail ngaol. 3 Eellel neq, Eilbav bhai goiqbhaoq bhaoq khi jalmul mul ya-a nail khe-ai, nuljuq Khali bhai meeq nail haol nail lavqkhoel nee maldil gaiq-a nail pha q neema lavqkhoel nee peivq-ail nail khul-il dai, ngal khaoqlaol nail ngaol. 4 Tsaol-aq teevq gaq ganav nuljuq jaol nail bha lal khi, ngaq-i mail cavq-a nail Yeiqsul al gaq nail ganl maq cavq mail, Yeiqsul yaoq gaq yaoq nail ganl cavq bhiq-u phao, nuljuq aqyu juq nail daoq bhai naldaiq nail ngaol. Al ovqtavq, nuljuq-i mail ya-a nail aqhaqlal maq ngel nail, aqhaqlal yaoq pha q yaoq bhai ya nail maqkhaiq, nuljuq-i mail hav bhoel-a nail lavqkhiq tsail nail geeqlaoq

daoq maq ngel nail, geeqlaoq daoq yaoq daoq yaoq bhai nuljuq hav bhoel nail ngaol. ⁵ Eeq jaiq heel jaiq nail gaqkhoel juq dai, nuljuq-i mail khul nail gaqkhoel al juq nee maqtsil ngal teevq peivq-ail maq theq jaiq-ail dai, ngal noeq nail ngaol. ⁶ Ngal daoq ge nail maq nia khi ngaol-aoq, neenoeq neekha aol naol. Ngal niailhai aol nail ngaol dai, yaoq pha q yaoq-ao nee nail lavqkhoel nuljuq bhai bhaqlaoq kheq dai, phaodaiq bhiq-a nail ngaol.

⁷ Nuljuq bhai thaqeeq bhiq nail dai khi, ngaq nail aqmaol bhai thaqtheq khi, lavqkhiq tsail nail geeqlaoq daoq bhai aqphoiq maq oil dai, nuljuq bhai cavq bhiq-a nail ngel-i mail, ngal oeqbal nl-a nail laiq. ⁸ Ngal nuljuq nail haqbhoil ganl nl kivq dai, Khali yaq yaoq munl yaoq juq nail phul oil nail neq, aqyu juq nail nlmaoq bhai tsai dov jaq nail khe-ai dul nail ngaol. ⁹ Ngal nuljuq nee jaol-u phao, ngal teevq pha ganav loq lal khi ngaol-aoq, nuljuq bhai teevq pha iqsanl maq hal-al. Khul khi mail dai ngal-aq, Maqgeiqdaolnil milkhaoq nee lee-a nail aqivq jaqbheq Khali yaq juq ngal khal loq nail juq bhai bivq lavq-a nail ngaol. Nuljuq bhai khul teevq pha gail maq bhi dal dai, ngal alhai nl-ai thaq nail khe-ai, iqmoeq phao iqsanl nl laivq nail ngaol. ¹⁰ Khali nail maldil tsaq nail pha q ngaq nail lavqkhoel bhai aol nail khe-ai, Aqgaqyal milkhaoq bhai jaol nail tsaol-aq teevq gaq-ail ngal neema eeq duq jiav nail niilniai maq lav tsoiq nia-ail. ¹¹ Khul khi mail ngel-ail. Ngal nuljuq bhai maq gaiq-a nail ngel-i mail laiq. Ngal nuljuq bhai gaiq-a nail ngaol dai, Miqyail heeq nia nail ngaol.

¹² Ngal neq, jel lal-u phao nl lavq-a nail khe-ai, iqmoeq phao iqsanl nl laivq nail ngaol. Khul khi mail dai ngal-aq neq, “Nvjuq iqsanl nuljuq khe-ai dul dai ganl nl nail ngaol” dai, gaqkhoel al juq teevq gaq-ail maq ge nia dai, ngal niailhai nl thailthaiq nail ngaol. ¹³ Al juq neq, maldil gaqkhoel maq ngel nail juq ngaol. Aqyu juq neq, Khali nail gaqkhoel juq khe-ai dul khi ngaol-aoq, goiqbhaoq bhaoq bhaoq-ail aqdoevq doevq nail juq ngaol. ¹⁴ Aqyu juq alhai nl nail bhai noeq-u maq dov dai pevq-ail duq maq jiav-ail. Khul khi mail dai ngal-aq neq, neivq Saqdaq iqsanl aqbhaq bhaq nail nqtavq gaqkhoel khe-ai, pevq nia nail ngaol. ¹⁵ Alhai dul dai, aivq nail ganl nl nail juq iqsanl, tsaq nail daol nail haqbhoil ganl nl nail juq khe-ai jiovq nail bhai, noeq-u maq dov dai, pevq-ail duq maq jiav-ail. Aqyu juq ganl nl nail khe-ai, haoqnao naosaq aqyu juq ya daq nail ngaol.

Paolluv-i mail gaqkhoel jiovq-u phao, ya daq-a nail ganl juq

¹⁶ Ngal teevq pov gaoq ge la dei-eiq. Nuljuq teevq gaq iqsanl ngaq bhai yaqjaoq khaqlal miqthoi niil dai, thaq noeq. Nuljuq alhai noeq khi ngaol-aoq, neema eeq nail lavqkhoel nee ngal daoq micil ge kivq dai, ngaq bhai yaqjaoq khaqlal miqthoi niil dai, saol-nvq lavq yaoq. ¹⁷ Ngal niailhai ge haq neq, Yeiqsul-i mail bhi ge lavq nail ngel-i mail ge nail maq ngel-ail. Yaqjaoq khaqlal miqthoi khe-ai neema eeq eeq-ail neekhaol teevq sil ge nail ngaol. ¹⁸ Thailhai ngaol-aoq, tsaol-aq maodai gaq aqsivq haqjoil

phao khe ganl nee neema eeq eeq-ail ge nail khe-ai, ngal iqsanl neema eeq eeq-ail ge lavq bhel. ¹⁹ Nuljuq neq, neenoq neekha aol nail tsaol-aq ngel-i mail, yaqjaoq khaqlal miqthoi juq bhai lavqkhiq teevq tsail dai, ol bhiq nail nial thoq laq. ²⁰ Khul khi mail dai ngal neq, tsaol-aq teevq gaq ganav nuljuq bhai yaqkav bhi jiovq lavq nail maqkhaiq, nuljuq nail nlmaoq bhai oil nail maqkhaiq, nuljuq bhai khoiqbhaoq goiqbhaoq bhaoq jaq lal nail maqkhaiq, aivq nail aqmaol bhai aivq tsiqeeq tsiq heel nail maqkhaiq, nuljuq bhai naqteiv teiv lal nail maqkhaiq, nuljuq ol ol-ail jaol-ail nial. ²¹ Nvjuq neq, alhai nl bhiq nail phao, gaq bhaq-ail nial dai, haqsil nail lavqkhoel nee ngal ya ge nail nial thoq. Thailhai ngaol-aq, tsaol-aq teevq gaq ganav neema eeq eeq-ail ge tseq haq neq, ngal iqsanl neema eeq eeq-ail ge tseq nail ngaol. (Ngal niailhai ge nail neq, yaqjaoq khaqlal miqthoi khe-ai ge nail ngaol.) ²² Aqyu juq Heiqbhail nail tsaol-aq laiq. Ngal iqsanl Heiqbhail tsaol-aq ngaol. Aqyu juq Ilsaqlaiqlal nail tsaol-aq laiq. Ngal iqsanl Ilsaqlaiqlal nail tsaol-aq ngaol. Aqyu juq Aqbhaqlaqhaq nail jeq-e jaq-a laiq. Ngal iqsanl aivq nail jeq-e jaq-a ngaol. ²³ Aqyu juq Khali nail yaqkav laiq. Aqyu juq nee maqtsil ngal Khali nail yaqkav ngaol. (Ngal niailhai ge nail neq, naiduq khe-ai, ge thailthaiq nail ngaol.) Aqyu juq nee maqtsil ngal ganl nl thailthaiq nail ngaol. Aqyu juq nee maqtsil ngal thaonq bhai aol daiq-a nail ngaol. Maq ge gil tsaol dai, khoeq lavq jiovq lavq nail bhai ngal ya daq-a nail ngaol. Sil heeq phaqaq-ail tsaq dai iqsanl, mee nia pov daq-a nail ngaol.

²⁴ Yuldav nail tsaol-aq-i mail hail tsel goiq lavq bhee dai, jiiqv lavq nail bhai, ngal ngaq pov ya daq-a nail ngaol. ²⁵ Neeqtsaq-i mail jiiqv lavq nail bhai hail pov bhee dai, ya daq khi, lovmav-i mail liv lavq nail bhai iqsanl teevq pov ya daq-a nail ngaol. Laovq cov-ail nail bhai hail pov bhee dai, ya daq-a nail ngaol. Teevq n teevq kivq iqyaq iqma nail lavqkhoel bhai ya jaol-a nail ngaol. ²⁶ Ngal teevq yanq ngal-aq, teevq pov gailkhaol dov ail nail lavqkhoel nee, mee nia phaq bhai geesil duq jiav jiav-ail tsao-a nail ngaol. Laoljaol eeq lee nail bhai maqkhaiq, tsaol pheel deeq lal nail bhai maqkhaiq, Yuldav nail tsaol-aq khoeq lal nail bhai maqkhaiq, yu nail jeq-e jaq-a khoeq lal nail bhai maqkhaiq, geesil geesil-ail tsao-a nail ngaol. Meenq lavqkhoel bhai maqkhaiq, haqtsoiq haqyal bhai maqkhaiq, iqyaq iqma kovtavq bhai maqkhaiq, geesil lal nail phaq bhai ya thaoqphuq-a nail nee ovqtavq, maldil Khali yaq maq ngel nail juq-i mail khal nl movq-ail nl lal nail bhai geesil geesil-ail, haq daiq-a nail ngaol. ²⁷ Ganl nl deedee khi haq deedee nail lavqkhoel nee, mee nia pov maq ya iqthaiq-al. Aoq iqsanl ulcuvq iqsanl moevq daiq-a nail ngaol. Aoq iqsanl mee nia pov jeeq daiq-a nail ngaol. Aqcoevq coevq nail khi aqgaq aqdoi maq jiav nail, niil juq bhai iqsanl ya daq-a nail ngaol. ²⁸ Niil juq bhai ya daq nail nee ovqtavq, Khali yaq munl iqsanl nail haqbhoil khaoqlaol heeq phaq-ail tsaq nail juq iqsanl yaoq n yaoq n nee ngaq nail kovtavq bhai jiav nail ngaol. ²⁹ Tsaol-aq teevq gaq ganav gaq bhaq haq neq, ngal iqsanl gaq maq bhaq-ail lai. Tsaol-aq teevq

gaq ganav bhai bhi laiq bhi tsa-ail haq neq, ngal maq noeqhaq-ail laiq.

³⁰ Ngal neema eeq eeq-ail, maldil daoq ya ge haq neq, ngaq nail gaq bhaq nail ganl juq taivq-ail neema eeq eeq-ail ge nail ngaol. ³¹ Ngal goiqbhaoq bhaoq nail maq ngel-ail dai, nqmaq maqluv halyeel tsiqeeq heeq pha-ail geel-nvq nail, Heeqphaq Yeiqsul nail Aqbhu Miqyail heeq nia nail ngaol. ³² Ngal Daqmaqsail meenq bhai jaol-u phao, ngaq bhai nieivq nail dai khi, heeqphaq Aqleiqdal nail pul-nvq khe jaol nail aqivq gaq bhai Daqmaqsail meenq bhai bhi lovq-a nail ngaol. ³³ Thailhai ngaol-aq, ngaq nail aqtsaoq ngaq bhai kavlaol nail lavqkhoel-ai bhi aol lai lavq khi, laolkhoeq bhai daol nail lolgov gov yaq nee phaiq kha gai-aivq lavq-a nail ngel-i mail, aqivq al gaq nail aqlavq lavqkhoel nee ya jel ail-a nail ngaol.

12

Aqhaqlal lavqkhoel nee Paolluv-i mail ya moel-a nail ganl

¹ Ngal neema eeq eeq-ail gaoq ya ge nail ngaol. Niailhai ge nail neq, ganl maq tsoiq khi ngaol-aq, Yeiqsul-i mail phaodaiq lavq-a nail juq khi aqhaqlal nail lavqkhoel bhai ya moel-a nail ganl juq nuljuq bhai ge lavq bhel dei-eiq. ² Jel lal-a nail tsel liq kovq bhai, nqtavq hail teiv-nvq bhai kev dai, tsiq dal laivq nail bhai yaq daq-a nail Khali yaq teevq gaq bhai, ngal heeq kivq nail ngaol. Aqmaol dav lai thaq-al meeq. Aqhaqlal dav lai thaq-al meeq. Miqyail taivq-ail heeq nia

nail ngaol. ³⁻⁴ Tsaol-aq al gaq Bhaqlaqdilsuv dai khul nail gaoqkhail bhai tsiq dal laivq nail bhai ya daq-a nail ngaol dai, ngal heeq kivq nail ngaol. A bhai, tsaol-aq yaq-i mail maq ge daiq bhiq kivq nail phaqa khi maq ge dov tseq nail phaqa bhai tsaol-aq al gaq ya gaiq-a nail ngaol. Aivq neq, aqmaol dav lai thaqa-al meeq. Aqhaqlal dav lai thaqa-al meeq. Miqyail taivq-ail heeq nia nail ngaol. ⁵ Ngal tsaol-aq al gaq nail ganl neema eeq eeq-ail ge la dei-eiq. Thailhai ngaol-aq, ngal gaq bhaqa nail juq nail ganl maq ngel nail neq, ngaq nail ganl neema eeq eeq-ail khul teevq phaqa-ail maq ge-ail. ⁶ Ngal neema eeq eeq-ail ge movq khi ngaol-aq, ngal yaqjaoq khaqlal miqthoi maq ngel-ail. Khul khi mail dai ngal-aq neq, ngal maldil tsaqa nail phaqa bhai ge nail ngaol. Thailhai ngaol-aq, ngaq-i mail nl nail hal nail juq bhai yu moel khi, ngaq-i mail ge nail thail nail juq bhai ya gaiq-a nail, niil nvq phaqa maq ngel nail neq, tsaol-aq teevq gaqa-ail ngaq nail ganl maq ya saol-nvq dai, ngaq nail ganl ngal neema eeq eeq-ail khul teevq phaqa-ail maq ge-ail.

⁷ Mao-ail eeq mao-ail heel nail juq phaodaiq lavqa-a nail bhaqda nee, ngaq nail neema bhai ngal maq ya thaqeeq dai, aqsivq haqjoil phao ngaq bhai khaoltsoe coev lavq nail khe-ai dul nail ngaol. Khaoltsoe al neq, neivq Saqdaq nail gaqkhoel pevq khi, ngaq nail neema bhai ngal maq ya thaqeeq dai, ngaq bhai khoeq lavq jiovsq lavqa-a nail ngaol. ⁸ “Khaoltsoe niil he dov lavq yaoq” dai, hail pov bhee dai, ngal Yeiqsul bhai hal-a nail ngaol. ⁹ Thailhai ngaol-aq aivq ge nail: “Ngaq nail geeqlaoq eeljaol naoq nail

haqbhoil lovq nail ngaol. Gaq bhaq nail dao bhai ngaq nail bhaqaoq bhee lal nail ngaol” dai, ge lavq-a nail ngaol. Alheel ngel-i mail, Khali nail bhaqaoq ngaq bhai khaq mao iqsanl uvthaiq lavq dai, ngal gaq bhaq nail ganl juq bhai neema eeq eeq-ail lavqkhiq teevq tsail, ge movq-ail nial. ¹⁰ Alheel ngel-i mail, Khali nail haqbhoil ya daq nail juq bhai ngal lavqkhiq teevq tsail daq nail ngaol. Ngaq-i mail ya daq thailthaiq nail juq neq, gaq bhaq nail, khal ge movq-ail ge lal nail, haq nail aoq nail, khoeq lavq jiovq lavq nail khi, mao-ail suqsaq nail, niil juq ngaol. Khul khi mail dai ngal-aq neq, ngal gaq bhaq thailthaiq-u phao, ngal gaq kav thailthaiq nail ngaol.

Paolluv Gaolliqthu Khali yaq juq nail haqbhoil neema kev nail ganl

¹¹ Ngal yaqjaoq khaqlal miqthoi pevq lal-a nail ngaol. Nuljuq ngaq bhai niailhai bhi pevq lal-a nail ngaol. Nuljuq ngaq bhai tsiqeeq nail tsaq nail ngaol. Ngal neq, khul teevq phaqa-ail maq nl dov nail tsaol-aq pevq khi ngaol-aq, eeq nail heel nail gaqkhoel al juq nail pul-nvq bhai teevq peivq-ail maq jaol-ail. ¹² Nuljuq ngaq bhai maldil gaqkhoel nial dai, ya heeq nia dai, ngal nl daiq bhiq-a nail ngaol. Bhi heeq bhi moel nail phaqa maqkhaiq, noeqa-ail maq dov nail phaqa maqkhaiq, bhaqaoq eeq nail juq maqkhaiq, ngal ol ol-ail, nuljuq bhai nl daiq bhiq-a nail ngaol. ¹³ Phul heel tsaojao-ai lavq yaoq dai, nuljuq bhai ngal maq hal-a nail al teevq phaqa maq ngel nail neq, Khali yaq yaoq juq yaoq bhai ngal thaqeeq khi nuljuq bhai maq thaqeeq nail, khul phaqa jiaav

nail-aiq. Thailhai ngaol-aoq, ngaq nail laiq nail al pha q bhai khalhai khi ngaol-aoq, oeqbal teevq pov phai q lavq yaoq dai, hal nail ngaol.

¹⁴ Hail pov teevq pov nuljuq jaol nail bha lee naol dai, niil aq-il iqsanl, ngal lainq-ai tha q nail ngaol. Niil tha l khe pov iqsanl, nuljuq nga q bhai ma q ya tsaojao-ai lavq-ail. Khul khi mail dai ngal-aq neq, nuljuq nail phul heel bhai ngal oil movq nail ma q ngel-ail. Nuljuq bhai taivq-ail ngal oil movq-ail nial. Yaq juq neq, aqbhu aqma nail haqbhoil phul heel ya halpov jil-ai nail ma q ngel-ail. Aqbhu aqma juq ya q juq nail haqbhoil ya halpov jil tha q-ai nail ngaol. ¹⁵ Ngal khal jiav nail pha q iqsanl khi mail nga q nail aqmaol iqsanl mail nuljuq bhai tsaojao-ai nail haqbhoil lavqkhiq teevq tsail danq-a nail ngaol. Ngal nuljuq bhai gaiq-a deedee nail ngel-i mail, nuljuq nga q bhai micil taivq-ail gaiq-a lavq nail laiq. ¹⁶ Ngal nuljuq bhai yalga q aqphoiq ma q hal khi ngaol-aoq, “Paolluv nvjuq bhai jalmul mul ya-a nail ngaol” dai, nuljuq ge nail ngaol. ¹⁷ Ngal tsaol-aq teevq ga q ganav bhai nuljuq jaol nail bha khoel-ai leevq khoel-ai leevq-ail, nuljuq nail phul heel bhai goiqbha oq bha oq ja q-a nail laiq. ¹⁸ “Aqyu juq jaol nail bha ail yaoq” dai, ngal Tiltuv bhai hal khi, aqivq jaqbheq al ga q bhai iqsanl aivq nee mail nuljuq jaol nail bha khoel-ai leevq-a nail ngaol. Tiltuv nuljuq nail phul heel bhai goiqbha oq bha oq ja q-a nail laiq. Nv-nvq ga q neema teevq heeq taivq-ail tavq khi ganl nl thailthaiq nail, ma q ngel-ail laiq. Nv-nvq ga q gailkhaol teevq khaol bhai taivq-ail tsa o nail, ma q ngel-ail laiq.

19 Nvjuq nuljuq nail sivantq bhai nvjuq nail ganl ge kovq nail dai taivq-ail, nuljuq noeq thailthaiq-ai haq nail lai. Maq ngel-ail dei-eiq. Nvjuq Khali yaq pevq nail khe-ai, Miqyail nail sivantq-ai nuljuq bhai ge bhiq thailthaiq nail ngaol. Ngal mao-ail gaiq-a nail aqtsaoq juq-ol, nil juq iqsanl mail nvjuq nl-a nail neq, nuljuq bhai bhi eeq bhi heel lal nail dai khi, nl-a nail ngaol. 20 Ngal nuljuq jaol nail bha kovq lal-u phao, ngaq-i mail noeqthunq-ai thaq nail khe-ai, nuljuq maq pevq lal-a nail nee ovqtavq, nuljuq-i mail noeqthunq-ai thaq nail khe-ai, ngal iqsanl maq pevq lal nail jaol-aq dai, khaoqlaol-ail nial. Iqdaiq iqtsai dov nail, maivjeel jeel nail, neejiav jiav nail, yovqgavq meeq lal dai taivq-ail nl nail, ge doil nail, haoqnaol phao nee khal ge movq-ail ge nail, neema eeq nail, suqsaq lal heeq pha-ail nl nail, nuljuq nil juq nl thailthaiq nail khul-il dai, ngaq bhai khaoqlaol-ail nial. 21 Nil thal khe pov ngal nuljuq jaol nail bha kovq lal-u phao, ngaq nail Miqyail nuljuq nail sivantq-ai ngaq bhai thaqtheq lavq nail bhai iqsanl ngaq bhai khaoqlaol-ail nial. Jel lal-u phao, maq meeq maq haol nail pha, maq tsaq maq daol nail pha khi mail khaqmiq sev nail pha nl nail tsaol-aq juq nil aq-il kev dai, oeqbal maq noeq pov nail ngel-i mail, ngal ya noeqhaq deede nail ngel-ail jaol-aq dai, khaoqlaol-ail nial.

13

Haoqnao naosaq khe cavq bhiq cov bhiq nail daoq

¹ Niil thal khe pov, nuljuq jaol nail bha lal nail niil neq, hail pov teevq pov ngaol. Khul khi mail dai ngal-aq neq, Jalliq lavqkhoel bhai niailhai gevq-ai thaq nail ngaol: “Khal ge nail yaoq pha q yaoq-ao nee aqduq aqtsil bhao dai, salkhil khanq nail nvq gaq hail gaq ya jaol nail ngaol” dai, gevq-ai thaq nail ngaol. ² Ngal nuljuq jaol nail bha nvq pov teevq pov nalga lal-u phao, ge-ail ceevq-a nail khe-ai, niil aq-il nuljuq nee mail maq jaol khi ngaol-aoq, gaoq ge-ai leevq-a nail ngaol. Ngal nuljuq jaol nail bha kovq lal haq neq, jel lal-u phao, oeqbal nl nail tsaol-aq bhai maqkhaiq, yaoq juq yaoq bhai maqkhaiq, maq bhi jel-ail. ³ Khali ngaq bhai juq khi daoq ge nail ngel-ail lai q dai, nuljuq heeq kivq movq nail ngel-i mail, ngal aqyu juq bhai maq bhi jel-ail. Nuljuq nail lavqkhoel bhai Khali ganl nl nail neq, gaq bhaq nail maq ngel-ail. Bhaqaoq eeq deede nee nail ngaol. ⁴ Khali neq, gaq bhaq nail lavqkhoel nee lavqyavq kovtavq bhai sil khi ngaol-aoq, Miqyail nail bhaqaoq bhaqda nee aivq niil aq-il aqdoevq doevq nail ngaol. Alhai dul dai, nvjuq Khali nail lavqkhoel bhai gaq bhaq khi ngaol-aoq, Miqyail nail bhaqaoq bhaqda nee, nvjuq Khali nee mail aqdoevq ya doevq nail ngaol dai, nuljuq ya moel nail ngaol.

⁵ “Ngal neema thaqtsaol nail pha q ivq ail lai q, maq ivq ail lai q” dai, yovqgavq bhai yovqgavq laonqdaiq yaoq. Aqmeeq-ai saol-nvq dai q yaoq. Nuljuq nail lavqkhoel Yeiqsul Khali jaol nail bhai, nuljuq maq heeq kivq-ail lai q. Maq ngel haq neq, nuljuq laonqdaiq nail pha q bhai maq khanqtsaol-ail. ⁶ Nvjuq neq, laonqdaiq nail pha q

bhai khanq tsaol nail tsaol-aq ngaol dai, ngal nuljuq bhai bhi heeq kivq movq-ail nial. ⁷ Nuljuq laiq nail tsa nail pha q maq ya nl dai, nvjuq Miqyail bhai geeqlaoq hal nail ngaol. Nvjuq laonqdaiq nail pha q bhai khanqtsaol nail ngaol dai, bhi dov lal movq nail ngel-i mail, geeqlaoq hal nail maq ngel-ail. Nvjuq maq khanqtsaol nail tsaol-aq khe-ai dul khi ngaol-aq, nuljuq aqmeeq pha q nl nia dai, nvjuq geeqlaoq hal nail ngaol. ⁸ Khul khi mail dai ngal-aq neq, maldil tsa q nail pha q bhai lav tsoiq dai, nvjuq khul teevq pha q-ail maq nl kivq-ail. Maldil tsa q nail pha q nail haqbhoil taivq-ail nvjuq nl kivq nail ngaol. ⁹ Nvjuq ga q bha q khi ngaol-aq, nuljuq ga q kav nail ngel-i mail, lavqkhiq tsail-ail nial. Nuljuq mee q lal bhee lal dai, nvjuq geeqlaoq hal nail ngaol. ¹⁰ Ngal nuljuq jaol nail bha kovq lal-u phao, Heeqpha q Yeiqsul nga q bhai aqyanq bivq lavq-a nail khe-ai, mao-ail ma q ya kha q dai, ngal nuljuq nee mail ma q jaol-u phao, ganl niil ju q ngal haoqgavq niil keiv bhai gevq bhoel-ai leevq-a nail ngaol. Aivq-i mail bivq lavq-a nail aqyanq al neq, nuljuq bhai lav cov nail haqbhoil ma q ngel-ail. Nuljuq bhai bhi ee q bhiq heel lal nail haqbhoil ngaol.

Haoqnao naosaq khe daoq

¹¹ Aqivq jaqbheq juq-ol, haoqnao naosaq khe daoq neq, niailhai ngaol. Nuljuq lavqkhiq tsail yaoq. Doevq phal yaoq. Nga q nail hal daoq bhai iqsanl, naldaiq lavq yaoq. Neema teevq heeq bhai taivq-ail tavq yaoq. Teevq ga q nee teevq ga q tsa q lai jil lai yaoq. Alhai nl haq neq, goil

nail gaiq-a nail phaḡ khi neesal-ovḡ nail phaḡ
bivḡ nail Miḡyail nuljuḡ nee mail jaol nail ngaol.
¹² Nuljuḡ teevḡ gaḡ nee teevḡ gaḡ meeq nail
haol nail lavḡkhoel nee aḡlavḡ he yaoḡ. Miḡyail
nail tsaol-aḡ-i mail nuljuḡ bhāi noeq moel naol
geiq dai, daoḡ cavḡ cavḡ bhoel-ai leevḡ-a nail
ngaol. ¹³ Heeqphaḡ Yeiqsul Khali nail geeḡlaoḡ
eeljaol, Miḡyail nail goil nail gaiq-a nail phaḡ
khi, Meeḡnail Haolnail Aḡhaḡlal nail lavḡkhoel
nee aḡtsaoḡ tsaḡḡ nail phaḡ, nuljuḡ iqsanl nail
kovtavḡ bhāi jiav dei-eiq.

Jalliq aqsivq Gaolkheel daoq
Akeu: Jalliq aqsivq Gaolkheel daoq New Testament
copyright © 2015 Wycliffe Bible Translators, Inc.

Language: Gaolkheel (Akeu)

Contributor: Wycliffe Bible Translators, Inc.

All rights reserved.

2020-11-13

PDF generated using Haiola and XeLaTeX on 21 Feb 2024 from source
files dated 29 Jan 2022
aaaba9fd-8172-55cc-ad15-906f43ddb5a5